

Siunnersuummut nassuiaatit

Nalinginnaasumik naassuiaatit

1. Inatsisissatut siunnersuummut tunuliaqutaasoq

UPA 2005/113-ip aappassaaneerutaasumik suliarineqarnerani Akileraartarnermut Akitsuusiisarnermullu Ataatsimiititaliap isumaliutissiissutaa tunngavigalugu Inatsisartut aalajangiipput Naalakkersuisut inassuteqarfigineqassasut akiliisitsiniartarnermi suliassat ataatsimut katersorneqarnissaannut pisariaqartunik siunnersuutinik saqqummiusseqqullugit.

Siunnersuummi matumani Inatsisartut aalajangiinerat, inatsiseqartitsinermi Namminersornerullutik Oqartussat oqartussaassuseqarnerannut tunngasortaanut tunngatillugu naammassineqarpoq.

Ataatsimiinnermi maanna ingerlanneqartumi aamma Kalaallit Nunaanni eqqartuussisarneq pillugu inatsisip allannguutissaanut siunnersuummut Namminersornerullutik Oqartussat oqaaseqaataat pillugu Inatsisartut aalajangiiffigisassaattut siunnersuut (UKA 2007/xx) suliarineqassaaq. Tamatumani pineqarpoq eqqartuussisarneq pillugu inatsimmi kap. 7, § 19, imm. 1, siunnersuutigineqarmat allanngortinneqassasoq, akiliisitsiniartartoq siunissami Naalakkersuisunit ivertinneqartalissasoq ullumikkutut kommunalbestyrelsenit toqqarneqartarunnaarluni.

Akiliisitsiniartarnermut nunamut tamarmut atuuttumik oqartussaassuseqartumik pilersitsineq, pisariillisaanerup tamatumuunalu aningaasatigut iluaqutaasumik sunniutissat saniatigut, pisortani suliassat suliarineqartarnerannut suliassallu agguataarneqarnerannut allannguutissanik annertuumik nassataqassaaq tamatumuunalu kommunit Naalakkersuisullu aqutsinerannut sulisuinullu sunniuteqassalluni.

Taamaammat suliap piviusorsiorlumik suliareqqissaarneqarnissaa siunertaralugu suliap KANUKOKA-p kommuninilu ingerlatsiviinut sinniisaasut peqataaffigisaannik ingerlanneqarsimavoq. Suliap tamatuma ingerlanneqarnerani erseqqissarneqarsimavoq, akiliisitsiniartarnermi suliap Namminersornerullutik Oqartussani ataatsimuulernissaat kommunini akerliuffigineqartoq. Taamaakkaluartoq ataatsimoortitsilernissaq piviusunngortinneqassappat, kommunini akiliisitsinararnermut tunngasut tamarmik Namminersornerullutik Oqartussanut nuunneqartariaqarput, tamatumalu kingorna akiliisitsiniarnermik suliap

annertunersaata katersugaanissaata sulissutigineqarnera aamma ingerlateqqittariaqarluni.

Anguniakkat makku akiliisitsiniartarnermi suliat aaqqissuunneqarnerannut attuumassuteqarput:

- Akiliisitsiniarnermi periaatsinik assigiiaartumik ingerlatsineq tamatumuunalu inatsiseqartitsinermi isumannaatsuutitsinissaq pingaartinneqarluni.
- Akiitsulinnik akiligassaqaqfigisanillu pitsaassuseqartumik kinguneqarluartumillu sullissineq.
- Akiligassalinnut akiliisinnaaneriniq ilimanaateqarnerpaasunut akiligassanik kinguaattoorutiniq akiliisitsiniarnermi aqutsineq tulleriissaarinerlu.
- Sunniuteqarnerpaamik akiliisitsiniariaatsinik atuinermi kingunerisassaannik pingaartitsineq.
- Akiitsunut kinguaattoorutinut ataqatigiissaagaasumik suliniuteqarneq.
- Aqutsinikkut suliasat sammineqarnerat.
- Allaffissornikkut sakkussat naleqquttut.
- Suleriaatsit naammassinniffiulluurtut.
- Ingerlaavartumik sulisunik ilinniartitseqqiisarneq ilinniakkanillu ingerlateqqiinerit.

Anguniakkat anguniarsinnaajumallugit Naalakkersuisut paasinninnerat malillugu akiligassanik kinguaattoorutiniq akiliisitsiniartarnermi oqartussaassuseqarnerup nunamut tamarmut atuuttuusumik ataatsimuulersinneqarnissaa pisariaqarpoq, pisortat pisassarisaannik kinguaattoorutaasunik akiliisitsiniartarnermi suliasat 1. januar 2008-miit akileraaruserivimmuut nuullugit.

Aaqqissuusaanikkut naleqqussarnerup saniatigut pisassaqaartuusut (kommunit, A/S Inissiaatileqatigiiffik INI, Nukissiorfiit, Namminersornerullutik Oqartussat il.il.) akiliisitsiniarnermilu oqartussaasup akornanni suleqatigiinneq eqaannerusumik ingerlasinnaaqqullugu malittarisassanik naleqqussaanernik pisariaqartunik pisariillisaanernillu siunnersuut imaqarpoq.

2. Inatsisissatut siunnersuutip imarisai pingaarnerit

Nunamut tamarmut atuuttuusumik akiliisitsiniarnermut oqartussaasuseq.

Akiliisitsiniarnermut nunamut tamarmut atuuttuusumik oqartussaassuseqartitsinermi. Nalakkersuisut isumaat malillugu maannakkut aaqqissuusaanermiit aammalu maanna kommunit 18-iusut kommuninut sisamanut katiterneranni aaqqissuussinermiit anguniakkat ajornannginnerusumik anguneqarsinnaassapput.

Assersuutigalugu ullumikkut ilisimasanik paasissutissanillu taartigiissuteqartarneq suliap i-ngerlanerani pisussaannartut isigineqarluni pisarpoq, taamaammallu ilisimasanik paasissutissanillu suliamut attuumassuteqartunik ingerlatitseqqiisarneq sulisuusunillu tamanit atorneqarsinnaanissaat qulakkeerneqarsinnaanani. Tamannalu aamma atuutissaaq kommuninut sisamanut katiterereermermi. Tamatuma kinguneraa

akiliisitsiniartarfiit ilisimasaasa suleriaasiisalu assigiinngissuteqartarnerat. Assigiinngissuteqarneq akiligassaqaqtunut akiligassaqaqfigisanullu tunngatillugu inatsisitigut isumannaatsuutitsinissamik sanngiinnerulersitsisuuvoq. Nunamut tamarmut atuuttuussumik akiliisitsiniartarnermi oqartussaasoq sulisut tamarmik ingerlaavartumik attavigineqartarnissaannut pisussaaffeqassaaq, tamatumani soorlu pikkorissaanertigut, ajornartorsiutit assigiit assigiisumik suliarineqarnissaannut periarfissiilluni tamatumuunakkullu kommunit akornanni killeqarfiit apeqqutaatinnagit assigiisumik pinninnissamik tunngavigisaq qulakkiissallugu.

Akiliisitsiniartarnermut nunamut tamarmut atuuttuussumik oqartussaassuseqarnermi siunertarisaq pingaerneq tassaassaaq akiligassaqaqtut akiliisinnaassuseqaqtut, imaluunniit piaaralutik akiliisinnaajunnaarnermut periutsumik, toqqorternermit il.il. iluaquteqarniarsaralutik akiliinissaminnit qimaaniarsarisut sammineqarnerisa salliutinneqarnerulernissaa. Tamatumani aamma ilaavoq ilaatigut pisortat akiliisitsiniartarnerata ataatsimoortuulernissaa siunertaralugu aammalu suliat maskiinarsornikkut suliarineqarsinnaanerata akiliisitsiniarnermik pitsaanerulersitsisinnaaffigisaat annertusaaviginiarlugu It-kkut nutaamik periuseqalerneq.

Aaqqissuussaaneq

Akiliisitsiniarnermik nunamut tamarmut atuuttuussumik ataatsimoortitsilernerup 1. januar 2008-imiit atuutilernissaa siunnersuutigineqarpoq.

Ataatsimoorussilerneq pissaaq akiliisitsiniarnermi kommunit suliassaat, matuma kingulerisaanik suliassanik nalunaarsuinermit allaaserisaq naapertorlugu, akiliisitsiniartarnermut oqartussaassuseqaqtumut nuunneqarnerisigut. Suliassalli kommunit akiligassaqaqfigineqarnerannut (akiligassiisutut oqartussaaffeqarfigisaat) attuumassuteqaqtut akiliisitsiniarnermi oqartussaasumut nuunneqassanngillat.

Akiliisitsiniarnermut oqartussaassutsimik aaqqissuussinissaq Naalakkersuisut suliassaannut tunngaviusumik, immikkut inatsisiliuuttariaqanngitsumut atasuuvoq. Taamaattumillu akiliisitsiniarnermut oqartussaassuseqarneq aallaavittut taamaallaat siunnersuummi § 11 a, imm. 1-mut tunngatillugu, takuuk siunnersuummi nr. 5, eqqartorneqarpoq.

Sulisut kommunini sulisorineqarnermiit akileraaruserivimmi sulilersut, aallaavittut najugarisartik qimassanngilaat illoqarfimmilu ullumikkut suliaminnik ingerlatsivigisaminni allaffeqassallutik. Taamaammat sulisut pineqaqtut suliaminnik ingerlatsiinnarniarlutik illoqarfimmut allamut nuuttariaqassanngillat.

Taamatut ilusiliinermit sulisut sumi najugaqarnissamut suliffeqarnissamullu tunngatillugu kissaateqarnerat annertunerpaamik aallaavigineqassaaq. Tamatumunngalu peqatigitillugu ilu-siliinerup innuttaasut suliffeqarfiillu sumiiffimmi maannakkut attaveqarfigineqarnerat ingerlatiinnarneqassalluni.

Piffissap ingerlanerani suliamut tunngasutigut ilisimasaqarneq, suliallu suliarineqarneranni pisariillisaanermik kissaateqarneq aallaavigalugit sulisunik

suliassanillu nunap immikkoortortaani allaffinnut assigisaannulluunniit katersuineqarsinnaassagunarpoq. Nunap immikkoortortaani allaffiit taakkua pinngitsooratik ullumi akileraarnermi nunap immikkoortortaani ingerlatsiviusuniittariaqassanngillat, attaveqatigiinnermut atortut nutaaliaasut ingerlalluurtumillu suliffeqarfiup iluani iluarsinerit periarfissallu assersuutigalugu suliffimmi avatangiisit naleqqulluurtut, sulianut ilisimasaqassutsimik piginnaassutsimillu piunasaqaatit salliutinneqarnissaannut periarfissiimmata.

Akiliisitsiniartartut pinngitsaaliinikkut akiliisitsiniarnermik sulianut ataasiakkaanut atatillugu ullumikkutut kredsrettinut atasuussapput. Ilaatigut akileraaruserinermi pisortaaqut akiliisitsiniartartuq pinngitsaaliinikkut akiliisitsiniarnermik suliassamik naammassinninnissamut tunngavissaqarneranik nalorninaateqarsinnaasunik suliakkeeqqusisinnaassanngillat. Taamatut pisoqartillugu akiliisitsiniartartup suliassaq eqqartuussisarneq pillugu inatsimmi malittarisassat malillugit kredsrettimut misilinneqartussanngorlugu suliassiissutigissavaa. Suliassanut pin-ngitsaaliinikkut akiliisitsiniarnermut tunngasuunngitsunut, assersuutigalugu sulisunut tunngasumik suliani, suliat ingerlanneqarnerannut aqqissuussinernut assigisaannullu tunngatillugu akiliisitsiniartartuq akileraaruserivimmi sulisut allat assigalugit ingerlatsivimmi aqutsisuusunit oqartussaaffigineqassaaq.

Akiliisitsiniarnermik nunamut tamarmut atuuttumik aqqissuussineq suliffimmi akimmisaarutissaqannginnerussaaq, tamatumuunalu akiliisitsiniarnermut oqartussaasumi nukinnik sunniuteqarnerusumik atuinissamut periarfissiineqassalluni, sulisut elektronikkilu atorlugu atortorissaarutit eqqarsaatigalugit. Ilaatigullu immikkut suliassaqarfiusunik aqutsiviusunik pilersitsinissaq ajornannginnerulissalluni piffisamilu pineqartumi sulisunik atorfissaqartitsiviusunut inissiisarnissaq ajornannginnerulerluni.

Sulisut atorluarneqarnissaasa salliutinneqarsinnaaneranut periarfissaqarneq annertusaavigalugu nunalu tamaat eqqarsaatigalugu suliat assigiiaartumik sularineqartussanngorlugit aammalu aqqissuussaannermi sumiluunniit assigiiaartumik tunuliaqutaqarsinnaaneranut periarfissiisumik aqqissuussaaneq ilusilerneqassaaq.

Aqutsinermik ingerlatsiviusunik arlaqartunik, immikkoortortanut tamanut atuuttuussumik pingaaruteqartut qulakkeeriviginissaat siunertaralugu, tamatumani soorlu sulisunik ilinniartitsineq ineriartortitsinerlu, pilersitsineqassaaq.

Suliassat

Akiliisitsiniarnermi oqartussaasup suliassaa tassaassaaq pisassarisanik akiliisitsiniartartup suliassani oqartussaaffigisaani akiliisitsiniarneq. Akiliisitsiniartartup sulianik oqartussaaffigisai Kalaallit Nunaanni eqqartuussisarneq pillugu inatsimmi kapitali 7-imi § 1, imm. 2-mi aamma Kalaallit Nunaanni eqqartuussisarneq pillugu inatsimmi kapitali 7-imi § 1, imm. 3 naapertorlugu pisortanut akiisut akilersinniarneqartarnerat pinaveersaartinneqarnissaallu pillugit Inatsisartut inatsisaanni § 2-mi aalajangersagaapput, ilaatigullu pineqarlutik ineqarnermut, kiassarnermut, innaallagissamut, imermut, eqqagassalerinermut

akiliutit, illuutigisami pigisanilu allani qularnaveeqqusiilluni pisortanit atukkanut erniaannullu akiliutit, akileraarutitik akiligassat, inuuniarnermut akilersuutitik pisassarisat, meeqperivinnut ulluuneranilu paaqqinninnermut pujoorfillu paaviarneqarnerannut akiligassat.

Akiliisitsiniarneq ilaatigut pisinnaavoq akissarnianit ilanngaassuinnikkut, pigisanik akiliutigititsinnikkut, akiligassaqarfignissaasumut taartaanikkut, pisassarisanik nuutsinnikkut, akilii-sinnaajunnaartutut suliassiissutiginnikkut pinngitsaaliissutaanngitsumilluunniit akilioraa-nernik aaqqissuussinertigut.

Pisassarisanut akiliisitsiniartartut sulianik oqartussaaffignngisaannut taamaattumillu akilii-sitsiniartartup pinngitsaaliinnikkut akiliisitsiniutigisinaanngisaannut tunngatillugu akiliisitsiniarnermi oqartussaasup kommunit Namminersornerullutik Oqartussallu akiliinissamut tuavisaarutitik nassiussuinnertigut, akilersuinnissamut isumaqatigiissuteqarnertigut, eqqartuussivikkoortumik suliassiissuteqarnertigut assigisaasigullu akiliisitsiniartarnermi suliassatigut ikiorsersortassavai. Akiliisitsiniartartut suliassanik oqartussaaffignngisaasa avataaniippot assersuutigalugu akissarsianik amerlanaarlugit tunniussat, kigutit nakorsaanut suliaritinnerit, sanaartorfikkuminarsaanermit akiliutit, aputaajaanermit akiliutit.

Aamma nunanit allanit piunasaqaatit Kalaallit Nunaanni akiliisitsiniartartumit akilersinniar-neqartartut aammalu Kalaallit Nunaanniit piunasaqaatit nunani allani oqartussaasunit akilersinniarneqartartut, siunnersuut malillugu akiliisitsiniartarnermi oqartussaasumit suliarineqartussaapput.

Pisassaqartuusut namminneq akiliisitsiniarnermik suliamik aaqqissuussinissaq, akiligassaasut suuneri apeqqutaalluni inatsisitigut periarfissat suleriaaserlu atorneqartartoq tunngavigalugu akiligassanik naatsorsuinnermik akiligassiissutinillu nassitsinnermik akilersuinnissamilluunniit isumaqatigiissuteqarnermik naafferartumilluunniit akilersuinnissamik aaqqissuussinnermik, akiliisinnermik nakkutilliinnermik tuavisaarinnermullu periuseqarnermik ilaqarsinnaasoq, suli isumagissassarissavaat.

Marloriaammik sulianik suliaqartarnerit killilersimaarniarlugit, piffissaq kommunit pisassarisaasa akilisitsiniartarnermi oqartussaasumut nuunneqarnissaannut piffissaq pisassarisat nalinginnaasumik akiliinissamut piffissarititaasup naannginnerani akilerneqanngitsut paasineqarnerannut siuartinneqassasoq siunnersuutigineqarpoq,. Tamatumuuna peqatigitillugu eqqarsaatigineqarpoq akilisitsiniartarnermi suliassat ataatsimoortinneqalernerata nassatarissagaa, kommunimi sulisut ullumikkut eqqaasitsissuteqarnermik periutsumik assigisaannillu ingerlataqartuusut akileraaruserivimmut nuunneqarnissaat.

Pisassassarisat akileraaruserivimmut akilersinniarneqarnissaannut nuunneqarnissaasa tungaanut kommunit pisassaqartuusullu allat naafferartumik akilersuinnissamik isumaqatigiissuteqarsinnaapput akiliinissalluunniit kinguartinneqarallarnissaanik akuersinnaallutik. Pisassarisat akileraaruserivimmut nuunneqareerneranni akiliisitsiniartarnermi oqartussaasoq kisimi naafferartumik akilersuinnissamut akuersissuteqarsinnaasuulissaaq imaluunniit akiliinissamik

kinguartitsigallarsinnaassalluni. Taamatut killiliineq tamakkuninnga ingerlatsisut nalorninnginnissaannik qulakkeerinissamik siunertaqarpoq.

Akiliisinnaassusseqarnermik naliliinermik imaluunniit nukinnik pisariaqartitsisumik assersuutigalugu akilersuinissamik isumaqatigiissuteqarnermik suliaqarnerni Kommunit allallu pisassaqtuusut sulinerisa ilaatinneqarnissaat siunertaanngilaq, akerlianilli periutsit pisariinnerusut atorneqassallutik.

Siunnersuutip illuatungaaticut akiliisitsiniarnermik suliami allaffissornikkut oqilisaanerit pisariillisaanerillu peqatigitillugulu illuatungaaticut suliat suliarineqarneranni qeratanninnerulerneq akiligassaqtullu ataasiakkaat inuttut atugarisaasa aallaviginerunissaat periarfissippai

Akiitsoqartuusooq pisassaqtumit ilisarimaneeqareertuuppat, assersuutigalugu kommunimi ikiuisarfimmit sullinneqartutut, akiitsoqartuusup aningaaticut inuuniarnerminilu atugarisai soorunami kommunip pisassaqtuusutut pisassarisat akiliisitsiniartarnermi oqartussaasumut akilersinniagassanngorlugit nassitsinissamut taarsiullugu naafferartumik akiliioraanissamik akiliinissamilluunniit kinguartitsigallarnissamik akuersisinnaaneranik naliliinermi tunngavissanut ilaatinneqarsinnaapput. Illuatungaaticullu siunertaanngilaq pisassaqtuusut ataasiakkaat akiligassaqtuusut pissutsit atugarisaat pillugit uppersaatinik piumasaqarfigisassagaat imaluunniit oqaatigineqartutut naafferartumik akilersuinissamik imaluunniit akiliinissamik kinguartitsigallarnissamik akuersinnaajumalluni paasissutissanik annertunerusunik pissarsiniartassat. Periarfissat pisassaqtuni ataasiakkaani nukinnik annertunerusunik atuffiunngitsutut sakkussatut aammalu nammineq piumassuseq aallaavigalugu atorneqarsinnaasutut eqqarsaatigineqarput.

Tamatumalu saniatigut pilersuiffiusumut attartukkamilluunniit akiliinngitsoqarneqarnerani kiassagaanermik innaallagissamilluunniit matusisoqassanersoq imaluunniit akiitsoqartoq attartukkamit anisinneqassanersoq pisassaqtuusup aalajangiisuusarnerata ingerlaannarnissaa siunnersuutigineqarpoq, taamatullu aamma pisassaqtuusooq aalajangiinermik piviusunngortitsinissamik isumaginnittussaalluni. Iliuutsit immikkut ittuusut pineqarput, piviusunngortinneqarnissaanni amerlanertigut isumaginninnermi oqartussaasunik qanimut suleqateqarnissamik nassataqartut imaluunniit tamatuminnga piumasaqaatitaqartinneqartut.

Piumasaqaataasup ilumut piunera annertussuseqarneraluunniit nalorninaateqartillugu, aallaaviusumik isumaqatigiinngissutigineqartoq pisassaqtuusup iliuuseqarneratigut paasiniaavigineqartassaaq.

Pissutsit allanngorneri

Pisassaqtuusut pisassarisaminnik akiliisitsiniartarnermi oqartussaasumut tunniussereernerminni akiitsoqartuusup pissutsit atugarisaasa annertuumik allannguuteqarsimanerannik ilisimasaqalerunik, pisassaqtuusup akiliisitsiniarnermik oqartussaassuseqartoq tamanna pillugu ilisimatissavaa.

Akiligassaqaqtuusup atugarisai pitsaanerulerpata, pisassaqaqtuusup tamatumunnga atatillugu akiliisitsiniarnermut oqartussaasuusoq akiliisitsiniarnerup pimoorunnerulerneqarnissaanik qinnuigisinnaavaa. Tamatumani pisassaqaqtuusup akiligassaqaqtumik ilisarismanninnera akiliisitsiniarnermi aalajangiisuusinnaavoq.

Utertitsineq

Aallaaviusumik pisassaqaqtuusut pissassarisaat akileraaruserivimmut tunniunneqarsimasut akornuteqanngitsumik utertissinnaavaat. Pisassarissalli nunap karsianit taarsiivigineqarnissamut pisinnaatitaaffiusut, pisassaqaqtumut, taannaluunniit sinnerlugu akiliisitsiniarnermik ingerlatsisimasumut, utertinneqassanngillat, tamatumani Namminersornerullutik Oqartussanit aningaasartuutaasut pineqarmata.

Pisut ilaanni utertitsineq akiliisitsiniarnermut oqartussaasup sulineranut toqqartumik akornusersuutaasinnaassaaq. Assersuutigalugu akiliisitsiniarnermut oqartussaasup akissarsianit ilanngaassuineq aallartissimappagu, akilersuinissamut isumaqatigiissuteqarsimalluni imaluunniit akiitsunik aqqissuussiffigineqarnissamik suliamik suliaq aallartissimappagu. Taaamatut assigisaanillu pisoqartarnera eqqarsaatigalugu siunnersuutigineqarpoq utertitsinissamik qinnuteqaatit akileraaruseriviup itigartissinnaassagai.

Suliap tunniunneqarnera

Akiliisitsiniarnermi oqartussaasumut tunniussinermi piumasaqaataavoq pisassaqaqtumiit allakkatigut tunniussineq pillugu akiligassaqaqtoq ilisimatinneqassasoq. Nalinginnaasumik ilisimatitsissuteqarnek akiliisitsiniarnermik ingerlatsinermi periutsimut ilaatillugu pisinnaavoq, assersuutigalugu akiligassiisummi imaluunniit – tuavisaarisarnek atornerqarpat – tunniussinnginnermi eqqaasitsissut kingulleq aqqutigalugu. Taamatuttaaq pissarisaq assersuutigalugu akiliinissamik kinguartitsigallarnissamik akuersissuteqarnissaq siunertaralugu pisassaqaqtuusumut utertinneqarpat, pisassaqaqtuusup akiligassaqaqtuusup ilisimatissavaa.

Akiliisitsiniarnermi oqartussaasoq suliami aatsaat peqataalissaaq, pisassaqaqtuusup pissarisaat akilersinniarneqarneranni periarfissat tamaasa atoreerpagit, tassa imaappoq akiligassaqaqtup akiliinissamut piffissaliunneqartoq malinngippagu imaluunniit naafferartumik akilersuinissamik isumaqatigiissutaasoq ataasiarluni arlaleriarluniluunniit eqqaasinneqartaraluarluni malinneqanngippat. Suliap tamatumunnga killinnerani aatsaat pissarisaasoq akiligassanik kinguaattoorutinngorsimassaaq, pisassaqaqtuusup akiliisitsiniarnermi oqartussaasumut akilernerneqarnissaanik siunertaqartumik tunniussaatur.

Kommuninut tunngatillugu siunnersuutigineqarpoq akiligassaqaqtup nalinginnaasumik akiliinissamut piffissaritinneqartup naannginnerani akilersimanngikkai paasineqaraangata pissarisaat akilersinniarneqarnissaannut akileraaruserivimmut tunniunneqartassasut, matuma qulaani suliassat allaaserineqarneranni oqaatigineqarneratut.

Pissutsit immikkut ittit inassutigintippassuk pisassarisaq siusinnerusukkut akiliisitsiniarnermi oqartussaasumut tunniunneqarsinnaavoq. Assersuutigalugu tamanna pisinnaavoq, piuma

saqaat akilersinniarneqartoq assersuutigalugu inuuniarnermut tapiissutitut ulluuneranilu paaqqinnittarfimmu akiliutitut tunngasuuppat peqatigitillugulu akiligassiissut alla arlaqartulluunniit akiliisitsiniarnermi oqartussaasumut akilersinniagassatut tunniunneqarsimappata. Taamatut pisoqartillugu akiligassaqaartuusoq ataatsimoortumik akilersuinissamik soqutiginnissinnaavoq, siunissami akiligassiissutigineqartussat isumaqatigiissummut ilaatillugit, taamaasiornikkut akilersuinissamik aaqqiinermi akiitsut tamarmiusut pineqarlutik. Tamatumunnga peqatigitillugu – pisassaqaartuusup soqutigisai eqqarsaatigalugit – ingerlaavartumik pisassaqaqatigiinnermut attuumassuteqartut ataatsimoortillugit akilersinnissaat qulakkeerpeqassalluni.

Erniat

Arlaqartutigit pisassarisat, siunnersuut malillugu akiliisitsiniarnermi oqartussaasumut aki-lersinniagassanngorlugit tunniunneqarsinnaasussat, ernialersorneqartarput. Pisassarisat ilaannut tunngatillugu erniat inatsisitigit aalajangigaasunik annertussusiligaapput. Ilaannullu ernialersuineri erniat pillugit inatsimmi malittarisassat, tunniussineri piumasqaatit assigisaalluunniit malillugit ernialiineqartarluni.

Pisassaqaartuusunut akiliisitsiniarnermilu oqartussaasumut suliakkersuutaasorujussuussaaq, pisassaqaartuusut ernialiunneqartut pillugit ingerlavartumik nalunaaruteqartassappata. Suliakkersugaaneq malunnaatilimmik annikinnerussaaq tamatumunnga suliaq akileraaruseriviup akiliisitsiniarnermut periusaanut atasumik aaqqiivigineqarpat.

Taamaattumik siunnersuutigineqarpoq pisassarisat akileraaruserivimmu akilersinniarnissaannut nuunneqartunik suliaqarnermut malittarisassanik nalunaarutikkut aalajangersaanissamut Naalakkersuisut pisinnaassuseqartinneqassasut.

Aalajangersakkap nassataraa pisassaqaartuusut qaammatip pisassarisat akileraaruserivimmu tunniunneqarfigisaata tulliata aallaqqaataaniit pisassarisaminnik sulissutiginninnissamik piumasqaateqarsinnaajunnaarnerat, nalunaarummi taaneqartumi malittarisassat malillugit ingerlassinnaasamik saniatigit.

Malittarisassanik aalajangersaanermi ernianut annertussutsit pisassaqaartuusup pisassarisanut ataasiakkaanut atugarisai aallaavigineqassapput, akiligassaqaarfigineqartup akiligassaqaartuusullu inissisimaneri annertunerusumik allannguuteqartinnagit, pisassarisat akileraaruserivimmu akilersinniarneqarnissaminnut nuunneqarneranni. Allannguutilli naatsorsueriaatsit assigiinngitsut atorneqarnerata kingunerisaanik pisarsinnaassapput.

Akiligassaqaqtut aningaasaqarniarnikkut atugarisaat ilaanni imaasinnaasarput pineqaqtup erniat ingerlaavartumik ilanngunneqaqtut akilersinnaasarnagit pingaartumillu akilersinnaalernissaannut periarfisaqanngilluinnarsinnaasarlutik, taamaattumillu ernialersuineramik ingerlatsiinnarneq taamaattoqaqtillugu siunertaqassanani taamaallaallu naatsorsuuserinermi tunngasumik tunngaveqaqtarluni. Tamanna eqqarsaatigalugu siunnersuutigineqarpoq akileraaruserivik ernialersuineramik unitsitsisinnaanissamut pisinnaatitaassasoq. Akiligassaqaqtup aningaasaqarniarnikkut atugarisai ajunnginnerulerpata imaluunniit paasinarsippat, ernianik unitsitsineq pillugu aalajangiinerup nalaani akileraaruserivik paasissutissanik attuumassuteqaqtunik pigisaqarsimanngitsoq, akileraaruserivik ernialersuinerup ingerlateqqinneqalernissaanik aalajangiisinaavoq.

Akiligassaqaqrfiusup pisinnaatitaaffii

Akiliisitsiniarnermi oqartussaasup piumasaqaatip akilersinniarnernani atugassamisut akiligassaqaqrfisap akiligassanut ataasiakkaanut il.il. atasunik pisinnaatitaaffii pisussaaffiilu tamaasa tigussavai. Tamanna atuuppoq ilaatigut akiliisitsiniarnermi sakkussat pisassarisanut ataasiakkaanut tunngatillugu inatsisitigut akuerisaasut eqqarsaatigalugit, imaluunniit akiligassaqaqrfiusup pisinnaatitaaffii allat, pisarneq malillugu atuuttuusut. Tamatumani ilaatigut pineqarlutik pigisanik qularnaveqqusiutiginninneq, akissarsianit ilanngaassineq, pisassarisanik ilanngaassineq, pisassaqaqtuusumut taartaasinnaanermut pisinnaatitaaneq, matusassat tullerriaarneqarnerat, agguagarsiassanik akuersissuteqarneq akiitsunillu iluarsaaqqinnermik siunnersuuteqarneq, eqqartuussivikkoortumik suliaasiissuteqarneq, akiliisinnaajunnaartutut suliaasiissuteqarneq, akiliinngikkallarnissamillu nalunaaruteqarneq.

Akileraaruseriviulli akiliisinnaajunnaartarneq pillugu inatsisip Kalaallit Nunaanni atortussanngortinneqarneranik peqqussutip avataatigut isumakkeerinninnermut tunngasunik suliani akiligassaqaqrfiit pisinnaatitaaffiinik tigusaqassanngilaq, tamatumani eqqarsaatigineqarluni suliat tamakkua immikkut sulianik ilisimasaqarnermik paasisimasaqarnermillu piumasaqaateqakkajunnerat. Tamatumani assersuutigalugu Ineqarnermut Attaveqarnermullu Pisortaqaqrfiup aamma A/S Inissiatileqatigiiffik INI-p, boligstuttemut akiligassanik kinguaattoorutit isumakkeerneqarnissaannik, boligstutte pillugu inatsisartut peqqussutaat naapertorlugu suliarineqaqtunik suliarinnittarnertik ingerlatiinnassavaat.

Akiliisitsiniartarnemi oqartussaasoq pisassarisanut tunniunneqaqtunut piginnittuulissanngilaq. Taamaammat pisassaqaqtuusut aningaasanik akilersinneqaqtunik pissarsisuunissaat allanngussanngilaq.

Pisassaqaqtuusut pisassarisap akilersiniagassanngorlugu tunniutinnginnerani, pisassarisanilli ilanngaaniissamut taartaanissamullu piumasaqaatit nammassineqarsimatillugit pisassarisanit ilanngaasinnaanermut taartaasinnaanermullu periarfisaqarnerannik killiliiniarneq siunertaanngilaq,

Paasissutissat

Siunnersuutigineqarpoq akiliisitsiniarnermi oqartussaasoq akiligassaqartup aningaasatigut, suliffeqarnikkut, najugaqarnikkut il.il. pissutsit atugarisaanut paasissutissanik, pisortani oqartussaasut nalunaarsuusiaat pillugit inatsimmi aammalu pisortat ingerlatsineranni suliassat suliarineqartarnerat pillugu Inatsisartut inatsisaanni sinaakkusiussat iluanni, paasissutissat akiliisitsiniarnermik suliamik ingerlatsinermut pisariaqartuutillugit, pissarsiniarsinnaassasoq. Siunnersuut malillugu paasissutissat, ingerlaannartumik suliamik misissuinermi ilaanissaat siunertaralugu, elektronikkimik atortorissaarutit atorlugit pissarsiarineqarsinnaassapput.

Soorlu akileraaruserivimmi sulisutut allatuulli akiliisitsiniartarnermi oqartussaasumi sulisut ingerlatsiviup IT-mik atugarisaani paasissutissanik tamanik nalinginnaasumik alakkarerisinnaanermut akuerisaassanngillat. Paasissutissanut suliap suliarineqarneranut attuumassuteqartunut isersinnaaneq tamatumunngalu akuerisaaneq sulinermik aqutsisuusut pisariaqartitsinermi siumoortumik suliani ataasiakkaani nalileereerneranni pisassaaq.

Suliassat suliarineqartarnerat pillugu inatsimmi malittarsisassat nalinginnaasut aamma nassataraat, akiliisitsiniartarnermi oqartussaasumi sulisut paasissutissanik isertuussassaasunik suliap ingerlanneqartup suliarineqarneranut pingaaruteqanngitsunik pissarsissanngitsut.

Siunnersuutigineqarpoq akiliisitsiniarnermi oqartussaasoq malittarisassat Naalakkersuisut aalajangersagaat malillugit akiligassanut kinguaattoorutitut tunngasunik paasissutissat ilaat akiligassaqaqfigisanut tunniussinnaassagaat. Paasissutissanilli ingerlatitseqqiinermi pineqartut taamaallaat tassaapput nalunaarsuutit akiliisitsiniarnermi oqartussaasumi suliassat suliarineqartarnerat pillugu inatsimmi aammalu pisortani oqartussaasut nalunaarsuusiaat pillugit inatsimmi inummut tunngasunik paasissutissanik katersineq, nalunaarsuineq ingerlatitseqqiinerlu pillugit malittarisassat naapertorlugit pissarsiarineqarsimasut.

Aammalu tunngavissaatinneqarpoq attaveqaqatigiinneq, tamatumani aamma pisassaqartuusup pineqartup aammalu akiligassanik akiliisitsiniarnermi oqartussaasup akornanni nalunaarsukkanik taartigeeqatigiinneq annertunerpaamik elektronikkimik atortut aqutugalugit pisassasoq.

Akiliisitsiniarnermi periuseq

Akiliisitsiniarnermi oqartussaasup sulinermi periuseqarnissaani aallaaviusumik eqqarsaataavoq suleqatigisanut akерlerisanullu periuseqarnerit assigiinngissitaartumik ingerlanneqartassasut. Taamaasilluni akiliisitsiniarnermi oqartussaasup anguniagassaa tassaalerpoq akiligassanut kinguaattoorutit nukinnik atuinikinnerpaajusumik naleqqunnerpaamillu periuseqarluni akilersinniarnissaat.

Inunnut ataasiakkaanut tunngatillugu siunertaavoq akiliisitsiniarnermi iliuusissanik qinerlernermi toqqaanermilu, naafferartumik akilersuinermik aaqqiinermi akissarsianillu ilanngaassinermi, akiligassaqartuusup qanoq annertutigisumik isertitaqarnerata isiginiarneqarnissaa, nukinnillu annertunerusumik atuiffiusunik

pigisanik akiliuteqartitsinerit akiligassanut kinguaattoorutini annertunerusuni taamaallaat atorneqartarnissaat ilimagineqartariaqarluni, akiligassaartoq qularnaatsumik tunineqarsinnaasunik pigisaqarpat imaluunniit akiitsut pisoqalivallaartuulernissaat pinngitsoortinniarneqassappat.

Suliffeqarfiup akiitsui pineqartillugit akissarsianik ilanngaassuineq annikitsuarsuarmik atorneqarsinnaavoq, taarsiullugu suleqataasunut naafferartumik akilersuisitsineq pingaartinneqarnerulluni, akerlerisanulli akiliisitsineq pigisanik akiliuteqartitsinikkut pissalluni. Akiligassanut kinguaattoorutit amerlasoorsuit pineqartillugit aamma pigisanik akiliuteqartitsineq pisassarisanik qulakkeeriniarnermi atorneqartassalluni.

Akiliisitsiniarnermi iliuusissamik toqqaanermi aamma akiitsut ingerlaavartumik amerliartornissaannik annilaanganartoqarnerisoq ilanngullugu eqqarsaatigineqassaaq. Taamaattoqartillugu iliuuseq tamatumunnga killiliisuusoq toqqarneqartussaasalluni.

Akiliisinnaassuseqarnermik naliliinerit assigiiartuulersinnerat, akiligassaartut pisuussutunik pigisaqaratillu isertitaqanngitsut imaluunniit annertugisassaannngitsunik isertitaqartut, akiliisitsiniarnermi oqartussaasumit, isertitaqaqqilinngikkallartillutik akiliisinnaassuseqalinngikkallarnerminnilu, annikitsuaraannarmik saaffigineqartarnissaannik qulakkeerinnermut ilapittuutaassaaq.

Sulinerup aqqissuunneqarnerani qitiusumik pingaaruteqartussaq tassaassaaq akiliisinnaassuseqarnermik naliliinerit sapinngisaq tamaat periuseq aalajangersimasoq atorlugu ingerlaannartumik pisalernissaa. Periuseq aalajangersimasoq atorlugu ingerlaannartumik akiliisinnaassutsimik naliliineq sulisunut suliakillisaataassaaq, taarsiullugu innuttaasunik suliffeqarfinnillu akiliisinnaassuseqartunik, imaluunniit piaaralutik akiliisinnaajunnaarnermik periutsimik atornerluinikkut, akiligassanik qimarratiginninniarnikkut il.il. akiliinaveersaartunik samminninnerulernissamut periarfissiisumik.

Agguaassisarneq pillugu aalajangersakkat

Akiliisitsiniarnermi sulianik akiliisitsiniarnermi oqartussaasumi ataatsimoortitsilernissaq oqaatigineqartutut 1. januar 2008-mi pissasoq siunnersuutigineqarpoq. Tamanna ilaatigut kinguneqassaaq akiliisitsiniarnermik suliat ingerlanneqartut kommuniniit akiliisitsiniarnermi oqartussaasumit suliarineqartussanngorlugit piffissami tamatumani tunniunneqarnissaat.

Tamatumani naatsorsuutigineqarpoq akileraaruseriviup pisassaartuusut ataasiakkaat sulianik tunniussinnermut atatillugu sulinikkut periusissanik isumaqatigiissuteqarfigissagai.

Siunnersuutigineqarpoq akileraaruserivik akiliisitsiniarnermik suliassap ingerlannerani atugassanik illuutunik ilaannaannilluunniit, allaffimmi atortunik assigisaannillu kommuninit attartornissamut pisinnaatitaassasoq. Taamaasiornikkut attartortitsisut illuutigisaq pineqartoq il.il. pigiinnassavaat, peqatigitilluguli akiliisitsiniarnermi suliassat tunniunneqarnerannut atatillugu sulisut

sumiiffissinneqarnissaata aaqqissuulluakkamik ingerlanneqarnissaa periarfissinneqassalluni.

1. januar 2008-mi ataatsimoortitsilernissaq sioqqullugu pisinnaatitaaffiit pisussaaffiillu suut kommuniniit akileraaruserivimmuut nuunneqarnissaat, sulisut sorliit nuutsinneqassanersut aammalu attartornermut isumaqatigiissutit suut isumaqatigiissutigineqassanersut isummerfigineqassapput.

Kommunit edb-nik atortui ilaatigut akiliisitsiniarnermi sulianik aqutsinermut atortunik imaqarput. Taamaattumik akiliisitsiniarnermik oqartussaasup 1. januar 2008-p kingornatigut tamakkuninnga ulluinnarni sulinermi paasissutissanillu pissarsiniarnermut atatillugu atuisinnaanissaa pisariaqartuuvoq. Taamatuttaaq akileraaruserivik kommunit naatsorsuuserinerannut naatsorsuutaannullu tunngasunik paasissutissanik takusaqarsinnaanissamik pisariaqartitsissaaq. Taamaattumik siunnersuutigineqarpoq inatsisissap saqqummiunneqarneraniit atuutilersumik akiliisitsiniarnermut atortunik paasissutissanillu taaneqartunik kommunit pigisaminnik akileraaruseriffik takusaqarsinnaanisaannut ammaatissagaat.

Aammalu siunnersuutigineqarpoq suliassanik sulisunillu kommuniniit Namminersornerlutik Oqartussanut nuussinermik ingerlatsinermi malittarisassanik Naalakkersuisut aalajangersaanissamut pisinnaatinneqassasut.

Sulisunut tunngasut

Inatsisissamut siunnersuut malillugu kommunini tjenestemandit akiliisitsiniarnermi sulianik taamaallaat imaluunniit annertunerpaamik suliaqartuusut, ullumikkut atorfeqarnerminni atugassarititaasut assinginik tunngaveqartumik Namminersornerullutik Oqartussani atorfeqarnermut nuussapput.

Tamanna isumaqarpoq nuunnermik kingornagut tjenestemandit pillugit inatsiseqartitsinermi ataatsimoorussanillu isumaqatigiissutini, inatsit taanna naapertorlugu isumaqatigiissutaasuni, pineqartunut ilaatinneqartut.

Inatsisissatut siunnersuutip kingunerissavaa akileraaruserivik atorfinitsitsisuussasoq, atorfinitsitaanerlu akileraaruserivimmi tjenestemandit allat atorfinitsitaanerattut issalluni.

Namminersornerullutik Oqartussani atorfinitsitaaneq immiini nuutsitsinerussanngilaq. Tjenestemandit nuunneqartut taamaasillutik siunnersuummi § 11 d, imm. 2 malillugu Namminersornerullutik Oqartussani atorfeqalernermit nuunneq kisiat tunngavigalugu taarsiissutitut akissarsianik, utaqqiisaasumik akissarsianik soraarnerussutisianilluunniit tunineqarlutik soraarsitaanissaminnik piumasaaqateqarsinnaanngillat.

Inatsisissatut siunnersuutip aamma nassataraa, tjenestemandit pineqartut siunissami nutaamik atorfinitsitaaffiusumi atorfimmik allamik naleqquttumik atorfeqalersinnaanermut pisussaaffeqalersinnaanissaat. Tamatumani Namminersornerullutik Oqartussani kommuninilu tjenestemandit pillugit,

Inatsisartut inatsisaat atuuttuusoq, periutsillu aaliangersimasut innersuussutigalugit. Atorfiup allap naleqquttuusutut isigineqarsinnaaneraniq naliliinermi atorfiup qanoq ittuussusiata maannamullu atorfigisamut ataqatigiisuunerata naliliiffiginerata saniatigut aamma eqqarsaatigineqassaaq atorfeqarfigisamik allanngineq pisortat suliffeqarfiutaasa nalinginnaasumik allanngortiterneqarnerannut atatillugu pisinnaanera. Aammattaaq naliliinermi ilinniagaqarnermut, ukioqqortussutsimut, peqqissutsimut, nalinginnaasumik atorfigisami isigineqarnermut tunngasut eqqarsaatigalugit naleqquttumik atorfimmut innersuunneqartutut oqaatigineqarsinnaassanersoq eqqarsaatigineqassaaq. Tamanna isumaqarpoq tjestemandip pineqartup atorfeqarfigilikkami nutaami naleqquttumik atorfimmik, maannamut atorfeqarfigisamini atorfigilissallugu pisussaaffiginngisamini, atorfeqalersinnaanissamut pisussaaffeqarsinnaanissaa.

Tamannali atuutinngilaq nutaamik atorfeqalerfigisami sinaakkutaasut iluanni atorfimmik allamik atorfeqalerneq immikkut inummut pineqartumut allannguutaasunik nassataqarpat.

Sulisut tjestemandiunngitsut, akiliisitsiniarnermik tamakkiisumik imaluunniit akiliisitsiniarnerinnangajammik suliaqartut, maannamut atorfeqarnerminni atugassarissaat ajorseriartinnagit akileraaruseriffimmi 1. januar 2008 aallarnerfigalugu atorfinnissaannut neqeroorfiginneqarput. Maannamut akiliisitsiniarnermi suleqataasut amerlanerpaartaat akileraaruserivimmi atorfinitsitaanissamut neqeroorut akuersaarpaat imaluunniit ilaasa kommune sulisitsisortik kommunimi atorfimmik allami atorfeqalernissaminnik isumaqatigiissuteqarfigisimallugu. Sulisorineqartut ikittuinnaat akileraaruserivimmi atorfinnissamut neqeroorut akuersaarsimangilaat, ullumikkut kommune sulisitsisorisartik kommunimi atorfimmik allamik neqeroorutissaqanngikkaluartoq. Taamatut pisoqartillugu aalajangersakkat atuuttut malillugit soraarsitsisariaqalerneq pisariaqalersinnaavoq, tassami ullumikkut atorfiit 1. januar 2008 allarnerfigalugu atorunnaartussaammata.

Akiliisarnerit

Akiliisitsiniarnerup ataatsimoortinneqalernerata nassatarissavaa akiitsoqartut akileraaruserivimmut pisassarisat akilersinniagassanngorlugit tunniunneqartunik akiliisarnissaat. Akiliisarnerit amerlanerpaartaat aningaaseriviit (netbankit aamma) allakkeriviilluunnit aqutigalugit ingerlanneqartassapput.

Akiliisitsinniarnermik suliaqarnermi sakkussat pingaarnerit ilaat tassaavoq akiligassaqartunik akilersuinnissamut isumaqatigiissutit. Pisut ilaanni akiligassaqartuusut annikitsuinnarmik akiliisarnissamut isumaqatigiissuteqarnissamut periarfissaqartarput.

Taamaammatt pisoqarsinnaasarpog, aningaaseriviit allakkeriviilluunniit akiliinermik suliaqarnerminnut atasumik aningaasartuutigisaat, akiliutip annertussusianut naapertuutinngitsut. Assersuutigalugu akiligassaqartoq akiligassanut kinguaattoorutinut qaammatit tamaasa 200 koruuninik akiliisarnissamik isumaqatigiissuteqarsimaguni, 21 koruuninik allakkerivimmut akiliinerit tamaasa

sullissinermut akiliisarneq naleqqutinngitsumik annertuvallaartutut akiliisup misigisimasinnaavaa.

Taamaattumik siunnersuutigineqarpoq, Naalackersuisut akiliutitik ingerlatsisartunik (ani-ngaaserivinnik, allakkerivimmik KNI-millu) 300 koruunit ataallugit akiliisoqartillugu akiitsoqartunik akiliuteqartitsisannginnissaannik isumaqatigiissuteqarsinnaanermut pisinnaatinneqarnissaat siunnersuutigineqarpoq. Illuatungiliullugu akiutitik ingerlatsisartut tamakkuninnga suliaqarnerminnut aningaasartuutaat nunap karsianit akilerneqartassallutik.

Pineqaatissiinerit

Siunnersuutigineqarpoq inatsimmi pineqaatissiinerimut malittarisassat nutarterneqassasut aki-leraartarnermut akitsuusiisarnermullu tunngatillugu malittarisassanut atuuttuusunut assersuunneqarsinnaasunngorlugit.

Taamaasiornikkut Inatsisartut inatsisaanni aalajangersakkanik unioqqutitsinerit, pasineqartoq nalunaarummi allaaserineqartumi pisuunerminik nassuersimatillugu, akiliisitaassutissallu oqaatigineqartup akilernissaanut pisussaaffilerluni, suliat allaffissornikkut aalajangigaasumik akiliisitsinermik naammassineqarsinnaalernissaat ammaanepassaaq. Pasineqartup allaffissornikkut akiligassiinermik akuersinera akisussaassusermut apeqqummut suliap inaarutaasumik naammassinninneruvoq, taamaasilluni akiliisitaanermik akuersineq suliap eqqartuussivimmi suliarineqarnissaraluanut taarsiulluni.

Aammattaarlu nalunaarutini Inatsisartut inatsisaat tunngavigalugu pilersinneqartuni najoqqutassiani (nalunaarutini) malittarisassanik unioqqutitsinermut akiliisitsineq pillugu malittarisassaliorsinnaaneq periarfissinneqarluni.

Kiisalu aamma aalajangersarneqarpoq Inatsisartut inatsisaannik unioqqutitsineq pillugu akiliisitaanermi akiliutit nunap karsianut nakkassasut.

Atuutilerneq

Aallaavittut siunnersuutigineqarpoq Inatsisartut inatsisaat 1. januar 2008-mi atuutilissasoq. Akileraaruserinerulli qitiusumik ingerlanneqalernerani misilittakkat takutippaat kommunit edb-mik atortuisa atorneqarsinnaanerisa nalunaarutillu siusinnerusukkut, tassalu inatsisissatut siunnersuutip saqqummiunneqarneraniit, atuutilernissaannik pisariaqartinneqarsinnaasoq.

Taamaammat siunnersuutigineqarpoq siunnersuummi § 11 e aamma 11 f, Inatsisartunut, Naalagaaffiup Sinniisaanut, Politinut, kommuninut eqqartuussivinnullu nassiunneqartut nassiunneqarneraniit sapaatit akunnerisa marluk qaangiunneranni atuutilissasut. Tamatumani suliaasaqarfiit nuunneqarnissaasa piareersarneqarnerat 1. januar 2008 sioqqullugu aallartinneqarsinnaanissaannut inatsisitigut tunngavissaqarnerup nalorninaateqarsinnaanera illuatungilerneqassalluni.

Nunamut tamarmut atuuttuusumik akiliisitsiniarnermi oqartussaasumik pilersitsinerup kingunerisaanik akiligassiisarneq pisassarisanillu akiliisitsiniartarnermi kommunit suleqatigiinnissaat pillugu Inatsisartut inatsisaat atorfissaarutissaq. Taamaammat Inatsisartut inatsisaata taassuma piunermini atorneqarsimangitsup atorunnaartinneqarnissaa siunnersuutigineqarpoq.

3. Aningaasat tungaasigut allaffissornikkullu pisortanut sunniutissai:

Akiliisitsiniartarnermi suliassat allangortinneqarnerat ataatsimoortunngortinneqarnerallu suliassaavoq annertoq, nutsaamik aaqqissuussaaneq tamakkiisumik inissinneqarpat aatsaat tamakkiisumik sunniuttussaasoq.

Tamatuma 2009/2010-ip ingerlanerani aatsaat pinissaa naatsorsuutigineqarpoq, matumalu ataatungaani ataatsimoortitsilernerme kommuninut Namminersornerullutik Oqartussanullu aningaasat tungaasigut sunniutissaanik naliliinermi ataatsimoortumik aaqqissuussinerup 2009/2010-mi tamakkiisumik atuutilernissaa aallaavigineqarpoq.

Piffissaq ungasinnerusooq eqqarsaatigalugu akiliisitsiniartarnermi suliassanik ataatsimoortitsi-lernerme siunertaq tassaavoq, naammassinnissinnaanerulernikkut pisariillisaanertigullu pisortat pisassarisaannik suliaqarnermi ullumikkumiit 10 %-imik pitsanngoriaateqartitsissasoq. Tamanna piviusunngortinneqarsinnaassanersoq pissutsit assigiinngitsut apeqqutaapput. Pitsaanerusumik aaqqissuussaannikkut siunertaqarnerusumillu iliuseqarnertigut piffissaq ungasinnerusooq eqqarsaatigalugu akiligassanut kinguaattoorutit amerlanerusut pinngitsoorani akilersinneqassapput.

Tamanna imaanngilaq pinngitsoorani akiligassanut kinguaattoorutit ikileriarnernannik kinguneqassasoq, aningaasarsiornikkut sumiiffimmi inuiaqatigiinniluunniit pissutsit atuuttuusut akiligassanut kinguaattooruteqarnermut annertuumik sunniuteqartuusarmata.

Aningaasat tungaasigut allaffissornikkullu pisortanut sunniutissat immikkoortunut pi-ngaarnernut arlaqartunut immikkoortiterneqarsinnaapput.

1. Sulisut atorfeqarnerminni kommuniniit Namminersornerullutik Oqartussanut nuunnerisa, tamatumani aamma sulisunut aningaasartuutit nassatarineqartut, assersuutigalugu sulisut inaannut aningaasartuutinut, sulinngiffeqarluni akiliunneqarluni angalanernut, atorfinitsitsinerni aningaasartuutinut, pikkorissaanernut aningaasartuutinut, pequtinut, atorfimmuut atatillugu angalanernut il.il., aningaasartuutit kingunerisaannik sunniutit.

Akiliisitsiniarnermik suliassat qitiusumik ingerlanneqalernerata suliassat suut ingerlaavartumik tiguneqarnissaat apeqqutaalluni akileraaruserivimmi sulisut inunnik 25-35-inik amerleriaateqassapput. Amerleriaateqarneq sulisunik kommuneniit Kalaallit Nunaanni Namminersornerullutik Oqartussanut nuussinerup nutsaanillu atorfinitsitsinerup kingunerisussaavaa. Nutsaamik atorfinitsitsinerit, siullermik akiliisitsiniartartunik, allaffimmi sulisunik inatsisilerituunillu atorfinitsitsinerussapput. Siullermik 2008-mi inunnik 25-inik 2009-imiillu suli

allanik qulinik sulisut amerleriarnissaat naatsorsuutigineqarpoq, taamaasilluni amerleriaatsit katillugit inuit 35-ussallutik. Tamatumuuna 2008-p pingaartumik kommuninut ikaarsaariarfiunissaa eqqarsaatigineqarluni, sungiunniagassanik nutaanillu suleriaatsinik pilersitsiviususaaq, taamaattumillu akiliisitsiniartarnermik suliaassanik ataatsimoortitsilerneq sulisoqarnikkut sunniutissai 2009-mi aatsaat tamakkiisumik malunniutissallutik.

Namminersornerullutik Oqartussanut akiliisitsiniartarnermik 1. januar 2008-mi tigusinermi amerlanerusunik aningaasartuutaasussat 13 millionit kroninut missiliuunneqarput, 9 million kronit missigisaat akissarsianut aammalu 4 million kronit missigisaat allatigut sulisunut aningaasartuutinut. 2009-miit atuutilersumik kisitsisit katillutik suliaqarfiusumi 18,0 mio. kroniussapput, 12,5 mio. kronit akissarsianut aammalu 5,5 mio. kronit allatigut sulisunut aningaasartuutit.

Amerlanerusunik aningaasartuutit kommuninut ataatsimoortumik tapissutit amerlaqataannik ikileriartinneqarnerisigut illuatungilerneqassapput.

Taamatutaaq kommunit ataatsimut isigalugit sulisut amerlassusilersugaaneramik inuit 25-35-it missigisaannik ikileriartitsisinnaapput aammalu taamatutaaq allatigut sulisunut tunngasutigut aningaasartuutitigut. 2009-mi siunissamilu kommunit ukiumut sipaarutissaat ataatsimoortillugit 18,0 million kroniussasut naliliissutigineqarpoq.

Naatsorsuutigineqarpoq 2008-mi pikkorissaanernut sulisullu piukkunnaataanik qaffassaanermut aammalu akiliisitsiniarnermik sulianik toqqorsivimmut inissitsiterinermut aningaasartuutinik atuneqarnissaa. Tamakkununga atatillugu aningaasartuutit Inatsisartut aningaasanut inatsisaanni Akileraartarnermi Pisorta qarfimmu aningaasaliissutaasut iluanni aningaasartuutigineqassapput.

2. Aningaasat ingerlaarnerisa, siunissami aningaasat nunap karsia aqqusaarlugu kommuninut pisassaartuusunullu allanut ingerlasunngorlugit, ullumikkutut kommunit aqqusaarlugit nunap karsianut pisassaartuusunullu allanut ingerlajunnaartillugit, allannngortinneqarnerata kingunerisaanik aningaasanik tigorianaatinit erniasiat.

Aningaasat ingerlaarnerannik allannguinikkut kommunit annaasaqartitaanissaat naatsorsuutigineqanngilaq.

3. Akiliutinik suliaqarnermut aningaasartuutit (aningaasaeriviit, allakkerivik KNI-lu), 200 koruunit ataallugit akiliuteqarnermi akiligassaartuusunut sullissinermut akiliisinneqartussaajunnaarlugit.

Akiliinerit qanoq amerlatigisarnissaat maannakkut eqqoriarneqarsinnaanngikkallarpoq. Amerlassusissaannut ilaatigut akiligassaartuusunut qanoq amerlatigisut girokortit atornagit, soorlu PBS, net aqqutigalugu akiliinernik, kreditkortit assigisaallunniit atortassaneraat apeqqutaavoq. Taamatut isumaqatigiissuteqarnermut atatillugu aningaasartuutit aningaasanut

inatsimmi Akileraartarnermut Pisorta qarfirmut aningaasaliissutaasut iluanni aningaasartuutigineqassapput.

4. Akiliisitsiniartarnermi periutsip naleqqussarneranut ineriartorteqqinneqarneranullu ani-ngaasartuutit.

Akiliisitsiniartarnermut tunngasut ataatsimoortinneqalernerisa aningaasatigut sunniutigisai tamakkiisumik sunniuteqartinniarlugit akiliisitsiniartarnermi periutsimik nutaamik ineriartortitsineqassaaq, 2007-imut aningaasaqarnermut inatsimmi 1,0 mio. kroninut missingiunneqartumik ukiunut 2007-imut 2008-mullu avillugit.

Ingerlatsinerimut, aserfallatsaaliinerimut akiliisitsiniartarnermilu periutsimik ineriartortitsinerimut ukiumut aningaasartuutit 50.000 kroninut missiliuunneqarput.

Kalaallit Nunaanni Namminersornerullutik Oqartussat akiliisitsiniartarnermik suliaassanik tigusineranni kommunit maannakkut atuuttumik akiliisitsiniartarnermi periutsimik ineriartortitseqqiisariaarutissapput.

Akilisitsiniarnermi periutsimut aningaasartuutit Inatsisartut aningaasaqarnermut inatsisaanni Akileraaruserivimmut aningaasaliissutaareersut iluanni aningaasartuutigineqassapput.

5. Akiliisitsiniartarnerup ataatsimoortilereratigut ungasinnerusoq isigalugu annertunerusumik ataatsimut pisortanut isertitaqarnerulernissaq anguniarneqarpoq.

Isertitsinikkut amerlanerussutissat sunniuteqarnerusumik akiliisitsiniarnikkut pissarsiarineqarnissaat ilimagineqarpoq, ataatsimoortumik akiliisitsiniarnermut oqartussaasoq, maannakkut mikisualukkuutaartunut aggugaanngitsaq, sunniuteqarluartumik akiliisitsiniartoqarsinnaanissaanut sulianut tunngasunik ilisimasaqarnermik qaffasissumik annertunerusumik pinngitsoorani pilersitsisinnaallunilu piuginnartitsinnaassammat.

6. Kiisalu ataatsimoortitsinerlerneq 2007-imi 2008-ilu aallarnisaanernut ikaarsaariarnermullu arlaqartunik aningaasartuutitaqartussaassaaq.

Naatsorsuutigineqarpoq tamakkua aningaasanut inatsimmi aningaasat atorneqartussatut akuersissutit iluanni konto pingaarnermi 24.01.01.-mi, Akileraartarnermut Pisorta qarfik, allaffissorneq, atorneqassasut,

Aningaasartuutit tamakkua aningaasaqarnermut inatsimmi kontomi pingaarnermi 24.01.01.-imi Akileraartarnermut Pisorta qarfirmut, allaffissornermut, aningaasaliissutaareersut iluanni aningaasartuutigineqarnissaat naatsorsuutigineqarpoq.

4. Aningaasaqarnikkut allaffissornikkullu inuussutissarsiuteqartuusunut sunniutissai:

Akiliisitsiniartarnermik suliassat ataatsimoortinneqalernerat immini inuussutissarsiteqartuusunut allaffissornikkut nammatassiinissaa ilimanangilaq, siunissamili akerlianik allaffissornikkut oqilisaassuteqartitsisinnaasariaqassalluni, akiliisitsiniartarnermi edb-kkut periuseq nutaaq anguniarneqartoq atuutilerpat akissarsianit ilanngaataasut assigisaallu elektronikkimik atortut aqputigalugit tunniunneqarsinnaalissammata.

5. Avatangiisinut pinngortitamullu sunniutissaai:

Siunnersuut avatangiisinut pinngortitamulluunniit sunniuteqartussaassangatinneqanngilaq.

6. Allaffissornikkut innuttaasunut sunniutissai:

Akiliisitsiniarnermik sulianik suliqartunik kommunit allaffiini ataatsimik arlaqartunilluunniit sulisoqassasoq aallaavigineqarpoq.

Taamaattoqanngippat kommunip allaffiani sulisumik ataatsimik arlaqartunilluunniit innuttaasunik ikiorsiisoqarsinnaasoqassaaq immersugassanik assigisaannillu tunniussisinnaasunik akiliisitsiniarnermilu oqartussaasumut attaveqartitsisinnaasussanik.

Pisariinnerunissaa pissutigalugu amerlanertigut innuttaasup illoqarfiani akiliisitsiniarnermi oqartussaasup allaffianut innuttaasoq atatinneqassaaq. Aallaavittulli allaffiit arlaannut sorlermulluunniit innuttaasoq saaffiginnissinnaasaaq, assersuutigalugu allaffimmut innuttaasup suliffianut qaninnerpaajusumiittumut. Taamaasilluni innuttaasoq akiliisitsiniarnermi oqartussaasoq attaveqarfiginiaruniuk "angerlaqqaartariaqassanngilaq".

Avaqqunneqarsinnaanngilarli naammassinnissinnaanerussuteqartumik sulianullu tunngasunik ilisimasaqanerumik akiliisitsiniartarnermi oqartussaasumik pilersitsinissamik kissaateqarnerup nassatarissammagu innuttaasut ilaasa akiliisitsiniarnermi oqartussaasumut qaninnerpaamut ungasinnerulernissaat. Innuttaasunik sullissinerup ilaa siunissami ullumikkut periutsinit ilisimaneqartunit allaanerumik periuseqarnikkut ingerlanneqalissaaq, assersuutigalugu kommunit allaffiini saaffiginnittarfitsigut, nunamut tamarmut atuuttumik oqarasuaatikkut sullissinikkut, telefax-ikkut computerillu atorlugit.

7. Naalagaaffeqatigiinnermut namminersulivinnissamullu tunngatillugu

Siunnersuut naalagaaffeqatigiinnermut namminersulivinnermulluunniit toqqaannartumik attuumassuteqanngilaq.

Siunnersuulli akiliisitsiniartarnermik pisortat ingerlatsineranni pisariillisaanermik, piuinarsaanermik pitsanngorsaanermillu siunertaqarpoq tamatumuunalu namminersulivinnissamik ineriartortitsinermi tunngavigisanik nakussassaalluni.

8. Pisortanit soqutigisaqatigiiffinnillu tusarniaaneq

Siunnersuut pisorta qarfinnut tamanut, KANUKOKA-mut, Kalaallit Nunaanni Sulisitsisut Peqatigiiffiannut (GA), ILIK-mut. Nunaqavissut Suliffiutillit Kattuffiannut (NUSUKA), Sulinermik Inuussutissarsiuteqartut Kattuffiannut (SIK), KNAPK-mut, Savaatillit Peqatigiit Suleqatigiisunut (SPS), Atorfillit Kattuffiannut (AK) aamma Ilinniagartuut Kattuffiannut/Kalaallit Nunaanni Akademikernes Sammenslutning-imut (ASG), tusarniaassutigineqarsimavoq.

KANUKOKA-p oqaatigisimavaa, pingaernerutillugu kommunit isumaqartut, akiliisitsiniartarnermut tunngasut tamarmik kommunini nutaaniiginnartariaqartut. Akileraartarnermut Pisorta qarfiup maannakkut pissutsit qitiusumik aaqqissuussinermut assersuuttuaannarmagit naleqqutinngitsoq, kommunit kattussuunnerat immiini sumiiffinni inukinnerpaajusuni akiliisitsiniarnerup nukittorsarneqarnissaanik nassataqartussaammat, tamatumuuna sumiiffinni innuttaasunik ilisimasaqarneq attaveqarnerlu annaasaqarfiginagit. Naammassinniffiulluarsinnaasumillu IT-mik atortunik aaqqeeriaraanni qitiusumillu pisortat pisassarisaasa tamarmik nalunaarsorneqarfigisaannik katersuivilerlugu, siammasissumik aaqqineq suliaqarfiusoq kommunerujussuarni sisamaniitinnarlugu, allaffissornikkut akikinnerpaamik naammassisaqarnarnerpaajusumillu aaqqiinerusaaq.

Tamatumunnga oqaatigineqassaaq akilisitsiniartarnermut tunngasunik Namminersornerullutik Oqartussani ataatsimoortitsilerneq Naalackersuisut paasinninnerat malillugu pisortanut akiliutissanik kinguaattoorutininik akiliisitsiniarnermik naleqqunnerpaamik aaqqissuussinermik angusaqaataassasoq. Siunnersuummi pingaernerutillugu siunertaasoq tassaavoq annertunerusumik sulianik nammassinnissinnaanissaq, nukinnik sipaagaqarnissaq aammalu – minnerunngitsumik – akiligassaqaqartut akiligassaqaqarfigisallu inatsisitigut isumannaatsumik atugaqarnissaat. Kommunerujussuit sisamat qularnanngitsumik anguniagassatut eqqartorneqartut pingasut tamaasa pillugit suliat ullumikkumit ajunnginerusunik naammassisinnaassavaat. Naalackersuisulli naliliipput, nuna tamakkerlugu atuuttuusumik akiliisitsiniartarnermut oqartussaasumik pilersitsineq sulianik naammassisaqarnerusinnaanermut, nukinnik sipaaruteqarnissamut suliallu suliarineqarneranni inatsisitigut isumannaatitsinissamut pitsaanerpaamik aaqqiinerusooq.

KANUKOKA-p erseqqissaatigisimavaa, siunnersuut tusarniaassutigalugu nassiunneqarsimasooq allaffissornikkullu kingunerisassatut allaaserineqartut ilanngullugit nassiunneqartut imminnut ataqatigiissuteqanngitsut.

KANUKOKA-p tamatumunnga oqaatigisai, suleqatigiissitat ingerlatamut atatillugu pilersinneqarsimasut suliaat, siunnersuummut (matuma qulaani imm. 3) allaffissornermut aningaasanullu tunngasunut oqaaseqaatinik allannguinermik kinguneqarsimapput.

KANUKOKA-p aamma oqaatigisimavaa, inatsisissatut siunnersuut

akiliisitsiniarnermik akiligassiinermillu immikkoortitsilernissamik kaammattuuteqartoq, kommunit akiligassiissutiniq, tuavisaarutiniq assigisaannillu nassitsisarnermut atasumik sulianik ingerlatsiinnarnissaannik nassataqartussamik Akileraartarnermullu Pisorta qarfik pinngitsaaliinikkut, eqqaasitsissummut kingullermut qisuariartoqanngikkaangat, akiliisitsiniartarnermik tigusiilluni. Kommunit isumaqarput taamatut immikkoortitsineq allaffissornikkut periutsiniq nutaanik pilersitsiinnassasoq. Suliaq Akileraartarnermut Pisorta qarfimmu tunniunneqassatillugu, kommunit piareersaanermut tunniussinermullu piffisarujussuaq atortassavaat, ataatsimullu isiginnilluni allaffissornikkut suliaqarsuutaanerussalluni sulianullu aningaasartuutit qaffassallutik. Qitiusumik ingerlatsilernerq annikininnerusumik allaffissornermik naammassinniffiulluarnerusumillu akiliisitsisarnermik nassataqassappat, suliaqarsat ataatsimut inissinneqarnissaat pingaartuuvuq. Kommunit isumaqarput taamatut suliaqarsanut inissiiviusoq kommunerujussuarniittariaqartoq, Inatsisartulli qitiusumik ingerlatsinissaq aalajangiusimassappassuk, kommunit suliaqarsat tassatuaasariaqarpoq akilgassanut kinguaattoorutiniq allattuiffimmik Akileraaruserivimmu nassitsisarinnissaq, malitsigitillugu akiligassiissutiniq, eqqaasitsissutiniq nassiusuinermut, akissarsianik ilanngaassinermu, naatsorsuuserinermut pinngitsaaliinikkullu akiliisitsinermu allaffissornikkut suliaqarsanik tamakkiisumik suliaqartussamut.

Siunnersuut kommunit kissaatigisaat naapertorlugit, siunnersuummi § 11 a, imm. 3, oqaaseqatigiit aappaat naapertorlugit, sapinngisamik allannngortinneqarpoq. Tamatumama saniatigit isumaqatigiissutigineqarpoq suleqatigiisitaliat pisortat akiligassiissusiortarnerata, kommunit Namminersornerullutik Oqartussallu akiligassiissutaat tamarmik piffimmit ataatsimiit nassiusunneqartartussannngorlugit, ataatsimoortinneqalernissaanut periarfissanik ukiup 2007-ip affaata kingulliup ingerlanerani misissuissasut.

Atorfillit Kattuffiata (AK) oqaatigaa, kommunini atorfeqartitaanermiit Kalaallit Nunaanni Namminersornerullutik Oqartussani atorfeqartitaanermu nuunneq nuutsitaanerusoq, Namminersornerullutik Oqartussani kommunenilu tjenestemandit pillugit Inatsisartut inatsisaanni § 42 naapertorlugu. Aammattaaq tjenestemandi inatsimmi tassani § 33 naapertorlugu ukiuni pingasuni suliartoqquneqariataarsinnaanermu akissarsianik/utaqqinermi akissarsianik akissarsiaqarluni soraarsitaasinnaavoq, tjenestemandit atorfik ingerlatsiviup aaqqissuussaanerata suleriaasiataluunniit allannngortinneqarneranut atatillugu atorunnaarsinneqarpat. Tasamaattumik AK isumaqarpoq siunnersuutip § 11 d-mu nassuiaatit ilai allatigit inatsiseqartitsinermik atorunnaarsitsisuusut taamaammallu allannngortittariaqarlutik.

Tamatununga oqaatigineqassaaq, siunnersuummi § 11 d, imm. 2-mu siunnersuutip nasataraa ilaatigit AK-mit uparuaatigineqartut Namminersornerullutik Oqartussani kommunenilu tjenestemandit pillugit inatsimmi aalajangersakkat matumani akiliisitsiniartarnermi suliaqarsanik ataatsimoortitsilernissamik siunnersuummut atatillugu atorfeqassannngitsut.

Siunnersuummi § 11 d, imm. 2 akiliisitsiniartarnermi suliassanik ataatsimoortitsilernissamut taamaallaat atatillugu atorneqassaaq. Taamaasilluni ataatsimoortitsilernissap saniatigut § 11 d, imm. 2 sunniuteqarani, taamaammallu Namminersornerullutik Oqartussani kommunenilu tjenestemandit pillugit Inatsisartut inatsisaanni malittarisassanik allannguinnissamik kinguneqassanani.

Tamakkua saniatigut siunnersuummut allanik oqaaseqaateqarsimanngilaq.

Tusarniaanermi akissuteqaatit Akileraartarnermut Akitsuusiisarnermullu Ataatsimiititaliamut ingerlatinneqarsimapput.

Aalajangersakkanut ataasiakkaanut nassuiaatit

§ 1-imut

Nr. 1-imut

Siunnersuutikkut Inatsisartut inatsisaata atuuffissarisai aamma pisassarisat unammilleqatigiinneq pillugu Inatsisartut inatsisaat tunngavigalugu pilersimasunut atuuttus-saasut annertusineqarput. Ilassutaasup tamatuma nassataraa, inatsimmi § 1 mi imm. 2, nr. 23-mi oqaaseq "aamma" kommamik taarserneqarnissaa taarsiullugulu "aamma" nr. 24-mi inissinneqarluni.

Inatsisartut ataatsimiinnermi tamatumani unammilleqatigiinneq pillugu Inatsisartut inatsisaannut siunnersuut, unammileqatigiinneq pillugu Inatsisartut inatsisaannut atuuttuusumut taartaasusaaq, suliarissavaat. Akiliisitsiniartarneq pillugu inatsimmik allannguut, unammileqatigiinneq pillugu Inatsisartut inatsisaat sorlerluunniit atuutissagaluarpat, atuutissaaq.

Nr. 2-imut

Inatsisartut inatsisaat akiliisitsiniarnermi suliassat ataatsimoortinneqalernissaannut aamma atuuttussatut siunnersuutigineqarnerata kingunerisaanik siunnersuutigineqarpoq, Inatsisartut inatsisaat atuuttuusooq kapilalinut qulequttanullu pingaarnernut qulequtaaqqanullu aggornilersorneqassasoq.

Nr. 3-mut

Siunnersuutigineqarpoq akiliisitsiniartartup sulisitsisuni allanilu akiligassanut kinguaattooritit akilersinniarnernannut pingaaruteqartunik paasissutissanik qinnuteqarsinnaanermut pisinnaatitaanera akileraaruserivimmuut nuunneqassasoq.

Nr. 4-mut

Siunnersuutigineqarpoq akiliisitsiniarnermi oqartussaasoq, nalunaarsuutit pisortat pigisaat pillugit inatsisip aamma pisortat ingerlatsineranni suliassat

suliarineqartarnerat pillugu inatsimmi sinaakkusiussat iluanni, pisortani oqartussaasuni allani, nalunaarsuiffinni aamma Pappiaqqanut nalilinnut Centralimi, akiligassaqartup aningaasatigut, tamatumani aamma pappiaqqanik nalilinnik pigisaqarneq pillugu, suliffeqarnikkut, najugaqarnikkut il.il. pissutsinut atugarisaanut paasissutissanut isersinnaassasoq, paasissutissat akiliisitsiniarnermik suliamik ingerlatsineranut pisariaqartuutillugit.

Inatsiseqartitsinermit atuuttuusunik erseqqissaateqarneq pineqarpoq. Aammalu nalinginnaasumik nassuiaatini inatsisissatut siunnersuutip imarisai pingaarnerit pillugit allaaserisami punkt 2-mi immikkoortumut "paasissutissat"-nut innersuussineqarpoq.

Aalajangersakkap akileraaruserivik, Kalaallit Nunaanni pisortat oqartusaasuini aammalu Danmarkimi Pappiaqqanik nalilinnut centralimi paasissutissanik ujarlernissamut tunngavissippaa. Imm. 2-mi nalinginnaasumik paasissutissanut tunngavoq, Imm. 3-li

pisortani nalunaarsukkani paasissutissat, tassa paasisutissat, nalunaarsuiviit pisortanit pigineqartut pillugit inatsimmi pineqartuinnaat pineqarlutik. Imm. 3 Danmarkimi, Savalimmiuni nunani allaniluunnit nalunaarsuivinnut pisortat pigisaannut atuutinngilaq.

Aalajangersakkap immi oqartussaasut paasissutissanik piniarfigineqartut, paasissutissanik kissaatigineqartunik akileraaruserivimmuut tunniussinissamut pisinnaatinnagilluunniit pisussaaffilinngilai, nalunaarsuinermit oqartussaasoq qaqugukkulluunniit malittarisassat atuuttuusut, tamatumani aamma nalunaarsuivimmuut pineqartumut nalunaarsuinermit malittarisassat atuuttuusut, naapertorlugit erseqqinnerusumik naliliisussaammat aalajangiillunilu. Nalunaarsuivinnut malittarisassat maannamut kommunini akiliisitsiniartartut akiliisitsiniartarnermilu allaffiit nalunaarsukkanut isersinnaanerit tunngavissaqartissimavaat, ilimagisariaqarporlu akileraaruserivik isersinnaanermit tamatumunnga taartaassasoq, nalunaarsuivinnut malittarisassat allannguuteqarnissaannik, § 11c, imm. 1 aamma § 11 d naapertorlugit, nassataqanngitsumik.

Kalaallit Nunaanni oqartussaasunut tunngatillugu, akileraaruseriviup nalunaarsukkanik takusaqarnissamik qinnuteqaataa ilaatigut suliassat suliarineqartarnerat pillugu inatsimmi §§ 27-31 tunngavigalugit nalilerneqassaaq. Tamatuma ilaatigut nassataraa, ingerlatsivimmi oqartussaasoq, paasissutissanik ingerlatiteqqiisinaanani naapertorlugu, aamma paasissutissanik ingerlatsinermit oqartussaasumut taassuma qinnuteqarnera naapertorlugu tunniussinnaanera. Tamatumani piomasaqataavoq paasissutissat oqartussaasup allap suliamik ingerlatsineranut aalajangiinermulluunniit, oqartussaasup allap aalajangiiffigisasaanut pingaaruteqartuussasut, suliassat suliarineqartarnerat pillugu inatsimmi § 30, imm. 1 naapertorlugu. Pisussaaffik, ingerlatsiteqqiineq oqartussaasumut naleqqutinngitsumik sulinerunissamik, suliassat suliarineqartarnerat pillugu inatsimmi § 30, imm. 2-mi eqqartorneqartut, nassataqassappat, atuutinngilaq.

Akileraaruserivik akulikitsunik paasissutissanik eletronikki atorlugu atortorissaarutit atorlugit nalunaarsuivinnit pisortat pigisaannit aallertarnissamik pisariaqartitsippat, nalunaarsuivimmuut ataavartumik attaviliinissamut periarfissaqarpoq.

Aalajangersakkap akiliisitsiniarnermi oqartussaasup akiliisitsiniarnermik suliap ingerlanneqartup suliarineqarneranut atatillugu paasissutissanik piffissami atuuttuusunik pissarsisinnaanissaa ajornarunnaarsissavaa.

Soorlu ullumikkut akileraaruserivimmi taamaattoq, paasissutissanik suliap suliarineqarneranut attuumassuteqartunik pissarsisinnaaneq tamatumunngalu akuerisaaneq sulisunik aqutsisut toqqartumik siumoortumik nalileereerneratigut pisassaaq.

Aammalu pisortat ingerlatsineranni suliassat suliarineqartarnerat pillugu Inatsisartut inatsisaanni § 33-imi nalinginnaasumik malittarisassat malillugit akiliisitsiniarnermi oqartussaasumi sulisut paasissutissanik isertuunneqartussaasunik suliap suliarineqartup suliarineqarneranut pingaaruteqanngitsunik pissarsisussaangillat.

Nr. 5-mut

§ 11 a

Imm. 1-imi aalajangersarneqarpoq akileraaruseriviup akiliisitsiniarnermi oqartussaasutut suliassat isumagissagai. Taamaasilluni akiliisitsiniarnermi suliassat akileraaruseriviup ataatsimut aaqqissuussaasumik suliffeqarfittut suliassanut ilanngupput. Aaqqissuussaanerme nutaami tassani suliassat maannamut kommunit akiliisitsiniartarfinit suliarineqartarsimasut taamaasillutik suliassanut ilanngupput.

Akiliisitsiniarnermi oqartussaasup salliutillugu suliassaa tassaassaaq pisassarisat akiliisitsiniartartut suliassanik oqartussaaffigisaanut ilaasut akilersinniarnissaat. Akiliisitsiniartartut suliassanik oqartussaaffigisaat Kalaallit Nunaanni eqqartuussisarneq pillugu inatsimmi kapitali 7, § 1, imm. 2-mi aamma pisortanut akiisut akilersinniarneqartarnerat pinaveersaartinneqarnissaallu pillugit inatsimmi § 2-mi, Kalaallit Nunaanni eqqartuussisarneq pillugu inatsimmi kapitali 7, § 1, imm. 3 naapertorlugu, aalajangersagaapput.

Tulliullugu akiliisitsiniarnermut oqartussaasup suliassaa tassaassaaq kommunit Namminersornerullutik Oqartussallu allatigut pisassarisaannik akiliisitsiniarnermi ikiorsiinissaaq, pisassarisat akiliisitsiniartartut suliassani oqartussaaffiginngikkaluarpatigilluunniit. Akiliisitsiniartartup suliasatigut oqartussaaffiisa avataanniippat assersuutigalugu akissarsianik amerlanaarlugit tunniussat, kigutit nakorsaannut suliaritinnerit, sanaartorfikkuminarsaanerme akiliutit aputaajaanermullu akiliutit. Ikiorsiineq eqqaasitsissuteqartarnermi periutsikkut, akilersuinissamik isumaqatigiissuteqarnertigut, eqqartuussivikkoortumik suliassiinertigut assigisaanillu akiliisitsiniarnermut tunngatillugu suliatigut pisarsinnaavoq.

Pingajuattullu aamma nunanit allanit piunasaqaatit Kalaallit Nunaanni akiliisitsiniartartunit akilersinneqartartut, Kalaallit Nunaanniillu piunasaqaatit nunani allani oqartussaasunit akilersinneqartartut, siunnersuut malillugu akiliisitsiniarnermi oqartussaasumit suliarineqalissapput.

Pisortat oqartussaasuisa akornanni pisassaqaarfigeqatigiinnerit, assersuutigalugu kommunip kommunemit allanit piunasaqaatai imaluunniit kommunip Namminersornerullutik Oqartussanit piunasaqaataat, akiliisitsiniartarnermi oqartussaasup suliaasa ilaginngilaat, pisassarisaq akiliisitsiniartartup suliaasani oqartussaaffigisaanut ilanngippat. Taamaattoqartillugu pisassaqaartuusup pisassarisaq allatut iliornikkut, assersuutigalugu eqqartuussissuserisumik ikiorteqarluni akilersinniartariaqarpai.

Aammalu nalinginnaasumik nassuiaatini inatsisissatut siunnersuutip imarisai pingaernerit allaaserineqarneranni immikkoortut aappaanni "suliaasat"-ni allaaserisat innersuussutigineqarput.

Akiliisitsineq ilaatigut pisinnaavoq akissarsianit ilanngaassinikkut, pigisanik qularnaveequsiutsitsinikkut, taarteqarsinnaanikkut, ilanngaanertigut, akiliisinnaajunnaartut suliarineqarnissamik qinnuteqarnikkut imaluunniit nammineq piunassuseq tunngavigalugu akilersuinissamut aaqqiinertigut.

§ 11 a-mi attaveqarnermik ilusiliineq aammalu pisassaqaartuusut akiliisitsiniarnermilu oqartussaasup nutaap akornanni oqartussaasuseqarnerup inissisimanagera aalajangersarneqarpoq.

Tassalu imm. 2-mi siunnersuutigineqarpoq pisassaqaartuusut ataasiakkaat maannamutut nalinginnaasumik akiligassiinermik suliaqarneq, tamanna pillugu malittarisassat periutsillu atorneqartut malillugit, ingerlatissagaat.

Piunasaqaatip, akiliisitsiniartarnermi oqartussaasumut tunniunneqarsimasup tunniunneqarnerata kingornatigut, ilumut piunera nalornissutigineqalerpat, akerliliineq pisassaqaartuusup iliuuseqarneratigut aaqqiiviginiarneqassaaq, eqqartuussisarneq pillugu inatsimmi kapitali 7, § 22 naapertorlugu eqqartuussivimmu akerliliissut saqqummiutassaassanngippat.

Siunnersuummi imm. 3 naapertorlugu, pisassarisat akileraaruserivimmu akilertinniarneqarnissaannut tunniunneqassapput piffissaagallartillugu akiliiffissaq qaangerneqarpat pisarnerlu malillugu eqqaasitsissuteqartarneq naammassineqareerpat. Akiliisitsiniarnermi suliamut ilaapput ilaatigut naatsorsuineq akiligassiisummillu nassitsineq, akiliisoneqarsimaneranik nakkutilliineq eqqasitsissutinillu nassitsineq. Akileraaruserivimmu nuussineqassaaq, akiligassaqaartuusup akiliinissamut piffissaliineq nalunaarutigineqartoq kingulleq qaangiutsinnagu akiliisimanngippat.

Kommuninut tunngatillugu siunnersuutigineqarpoq pisassarisanik akileraaruserivimmu akilersinniagassanngorlugit tunniussinissamut piffissaq, akiligassaqaartuusup nalinginnaasumik akiliinissamut piffissaasup qaangiunnerani

akiliisimannginnerata paasineqarneranut siuartinneqassasoq. Tamatumani akileraaruseriviup kommunip pisassarisaanut tunngatillugu nalinginnaasumik eqqaasitsissuteqarnermik suliaasaq i-ngerlatissavaa. Tamatumani marloriaammik suliaqartarnej killilersimaarniarneqarpoq aammalu kommuneni sulisut ullumikkut eqqaasitsissuteqarnermik il.il. suliaqartuusut akileraaruserivimmut nuunneqarnissaannut atatillugu isigineqassalluni.

Pisassaqtuusup pisassarisanik akileraaruserivimmut tunniunneqartunut pigisaqartuuneq attatiinnassavaa. Tunniussinerullu nassatarissavaa akileraaruseriviup akiligassaqtarfiusup pisinnaatitaaffinik atuisinnaalersinneqarnera, matuma ataani siunnersuummi § 11 c-mut erseqqinnerusumik allaaserisaq takuuk.

Akiliisitsiniarnermut oqartussaasumut tunniussinissami piumasaqaataavoq, akiligassaqtartoq tunniussineq pillugu pisassaqtuusumit allakkatigut ilisimatinneqarsimanissaa. Tamanna suliap ingerlanneqarneranut atatillugu eqqaasitsissummut kingullermut imaluunniit naafferartumik akilersuinissamik aaqqiinermik assigisaanilluunniit akuersissuteqarnermut atatilugu pisinnaavoq. Taamatuttaaq pisassarisaq utertinneqarpat aamma pisassaqtuusup akiligassaqtuusooq tamanna pillugu nalunaarfigissavaa.

Imm. 4-mut siunnersuummi erseqqissaatigineqarpoq, pisassaqtuusooq pisassarisap akilersinniarnissaanut akileraaruserivimmut tunniunneqarnissaata tungaanut, akiligassaqtuusup qinnuteqarneratigut akiliisitsiniarnermi suliamut ilaatillugu naafferartumik akilersuinissamik akuersissuteqarsinnaasoq. Pisassarisap akileraaruserivimmut tunniunneqareernerani akiliisitsiniarnermi oqartussaasoq kisimi naafferartumik akilersuinissamut imaluunniit akiliinngikkallarnissamut akuersissuteqarsinnaasuulissaaq. Taamatut killiliinermi siunertarineqarpoq allaffissornermi suliani paatsuunganartoqannginnissaata qulakkeerneqarnissaa.

Eqqarsaataavoq akiligassat annertussusiat eqqarsaatigalugu pisassaqtuusup nammineq akiligassaqtuusooq akiliinissamut piffissamik sivisunerusumik (akiliinngikkallarnermik) akuersissuteqarfigisinnaassagaa, assersuutigalugu aningaasanik tigorianaateqarnermi qaangiuttussamik ajornartorsiorneqarpat. Aamma imaassinnaavoq akiligassaqtuusooq akilersuinissamut isumaqatigiissuteqateqarfigineqartoq, assersuutigalugu aningaasat akiligassanngorsimasut naafferartumik akilersorneqartussanngorlugit.

Siunnersuummi pisassaqtuusup akilersuinissamik isumaqatigiissuteqarnermut atatillugu akiliisinnaassuseqarnermik naliliinermik suliaqannginnissaa siunnerfigineqarpoq.

Pineqartuni akiliisitsiniarnermut malittarisassaqaereerfusuni malittarisassaliorfineqartussaasuniluunniit akilersuinissamut akiliinngikkallarnissamulluunniit aaqqissuussinermik imm. 4-mi siunnersuutigineqartup assigisaanik imaluunniit taamatulli eqaatsumik akiliisitsiniarnermi periuseqarfiusunik, malittarisassat taakkua, immikkut pineqarnissamut tunngasumik isummaq malillugu, taarsiullugit atorneqassapput,

malittarisassat taakkua inatsisikkut inatsimmiluunniit erseqqissumik pisinnaatitaaneq naapertorlugu aalajangersagaappata.

Akiliisitsiniarnermi periarfissat tamarmik misilinneqareerpata aatsaat, tassalu akilersuinissamut isumaqatigiissut sumiginnarneqarsimappat imaluunniit akilersuinissamut isumaqatigiissut akuerineqarsimangippat, akiitsut sinneri tamakkerlutik tigujumaneqarsinnaalissapput akiliisitsiniarnermullu oqartussaasumut akilersinniagassanngorlugit tunniunneqarlutik, akiitsut piaartumik akilerneqanngippata.

Pissutsilli immikkut ittut tamanna inassutigippassuk, pisassarisat akiliisitsiniarnermut oqartussaasumut piffissaq tamanna sioqqullugu tunniunneqarsinnaassapput. Tamanna pisinnaavoq assersuutigalugu piumasaqaatit ineqarnermut akiliutinut, inuuniarnermut tapiissutinut ulluuneranilu meeqperivinnut akiligassanut tunngasuuppata tamatumunngalu peqatigitillugu pisassarisaq alla arlaqartulluunniit akiliisitsiniarnermut oqartussaasumut tunniunneqareersimappata. Taamatut pisoqartillugu akiligassaqaartuusoq ataatsimoortumik akilersuinissamik soqutiginnissinnaavoq, siunissami akiligassiissutigineqartussat isumaqatigiissummut ilaatillugit, taamaasiornikkut akilersuinissamik aaqiinermi akiitsut tamarmiusut pineqarlutik. Tamatumunnga aamma peqatigitillugu – pisassaqaartuusup soqutigisarissinnaavaa – ingerlaavartumik pisassaqaqatigiinnermut attuumassuteqartut ataatsimoortillugit akilersortinnissaat qulakkiissallugu.

Aammalu nalinginnaasumik nassuiaatini inatsisissatut siunnersuutip imarisai pingaarnerit allaaserineqarneranni immikkoortut aappaanni "suliassat"-ni allaaserisat innersuussutigineqarput.

Imm. 5-mi siunnersuutigineqarpoq akiliisitsiniarnermut oqartussaasumut tunniussinermit piumasaqaatit akiligassaqartoq pisassaqaartuusumit tunniussineq pillugu allakkatigut ilisimatinneqassasoq. Nalinginnaasumik ilisimatitsissuteqarneq akiliisitsiniarnermik ingerlatsinermi periutsumut ilaatillugu pisinnaavoq, assersuutigalugu akiligassiissummi imaluunniit – eqqaasitsissuteqartarneq atornerqarpat – tunniussinnginnermi eqqaasitsissut kingulleq aqutugalugu. Ilisimatitsissuteqarnissamut pisussaaffik naammassineqarsinnaavoq, pisassarisat, tamakkiisumik ullormi siumut taaneqartumi akilerneqarsimangippata, akilersinniagassanngorlugit tunniunneqassasut nalunaarugineratigut. Akerlianilli ilisimatitsissuteqarnissamut imm. 5 malillugu pisussaaffik naammassineqarsimassanngilaq, pisassaqaartuusup pisassarisat akilersinniagassanngorlugit kingusinnerusukkut nassiunneqarsinnaanerit ilisimatitsissutiginnarsimappagu.

Imm. 6-imi siunnersuutigineqarpoq, pisassaqaartuusut ataasiakkaat pisassarisaminnik akiliisitsiniarnermi oqartussaasumut tunniussereernerminni akiitsoqartuusup pissutsit atugarisaasa annertuumik allannguuteqarsimanerannik ilisimasaqalerunik, pisassaqaartuusup akiliisitsiniarnermik oqartussaassuusoq tamanna pillugu ilisimatissagaa. Pisassaqaartuusut tamatumunnga atatillugu akiliisitsiniarnerup pimoorunneqarnerulernissaanik akileraaruserivik qinnuigissinnaavaa.

Annertuumik allannguuteqarnertut isigineqarpoq assersuutigalugu, pisassaqartuusup ilisimalersimappagu, akiitsoqartuusup suliffeqanngitsoq suliffittaarsimasooq, akiligassaqartuusup annertuumik kingornussarsisimasooq, akiligassaqartuusup nunamut allamut nuunnissamik pilersaaruteqartoq paasissutissallu allat akiliisitsiniartarnermi oqartussaasup akiliisitsiniarnermik suliamik ingerlatsineranut pingaaruteqartut.

Ataatsimut isigalugu akiliisitsiniarnermi oqartussaasup pisassaqartuusullu ataasiakkaat akornanni suleqatigiilluarnissap pingaartinneqarnissaa siunertaavoq. Taamatut suleqatigiinnermi pissusissamisuginnaassaaq, akiliisitsiniarnerup pitsaanerpaamik ingerlanissaa siunertaralugu pisassaqartuusup paasissutissanik suliamut attuumassuteqartunik akiliisitsiniarnermut oqartussaasumut tunniussinissaa, tamannalu pisassaqartuusut siunnersuummi oqaatigineqartutut pisussaaffigalugu. Taamatut suleqatigiinneq akiliisitsiniarnermi periutsimik nutaamik, nalinginnaasumik nassuiaatini imm. 3-mi aningaasat tungaasigut allaffisornikkullu pisortanut sunniutissanik eqqartuinnermi eqqartorneqarnera naapertorlugu, ineriartortitsinermut atatillugu suli tapersiivigineqassaaq.

Imm. 7-imi siunnersuutigineqarpoq pisassaqartuusup akiligassiisummik akilersinniarneqarnissaanut tunniunneqareersimasumik tamakkiisumik ilaannaasumilluunniit utertitsisinaassasoq. Aallaaviusumik pisassaqartuusut pisassanik akilersinniagassanngorlugit tunniunneqarsimasunik akornutissaqanngitsumik utertitsisinnaanerat pineqarpoq.

Pisassaqartuusullu pisassarisanik akileraaruserivimmiit utertitsisinnaanerat killilerneqassasoq siunnersuutigineqarpoq, akiligassaqartuusumut tunngasut akileraaruserivimmi suliarineqarnerat ingerlanneqarpat. Taamaatoqartillugu akileraaruseriviup utertitsinissamik qinnuteqaat itigartitsissutigisinnaavaa. Akiligassaqartumut tunngasut suliarineqarnerattut isigineqarpoq assersuutigalugu pinngitsaaliinikkut akiliisitsiniarneq ingerlanneqarpat, akilersuinissamut isumaqatigiissuteqartoqarsimappat, akiliisinnaajunnaartutut suliarineqarnissaaq suliassiissutigineqarsimappat, akiitsunik aqqissuussivigineqarnissaaq pillugu suliaq aallartinneqarsimappat eqqartuussivikkoortumilluunniit suliassiineqarsimappat. Akileraaruserivillu akiitsoqartuusumut suliaq ataaseq arlaqartulluunniit pillugit attaveqarnermik aallarniisimappat (oqaasiinnartigut allakkatigulluunniit), tamatuma kingunerisinnaavaa akiitsoqartuusumut tunngasumik suliamik ingerlatsinertut isiginninneqarnera.

Pisassarisanik akileraaruserivimmut akilersinniagassanngorlugit tunniunneqarsimasunik utertitsisinnaanermut killiliineq, utertitsinerup akileraaruseriviup sulineranut akornutaasinnaanissaata eqqarsaatigineqarneranik patsiseqarpoq.

Pisassarisanik akileraaruserivimmut akilersinniagassanngorlugit tunniunneqarsimasunik utertitsisinnaaneq pingaartumik naleqquttuusinnaavoq pisassarisat akiliisitsiniartartup suliatigut oqartussaaffigisaanut ilanngippata. Taamaattoqartillugu pisassaqartuusup allanit, assersuutigalugu eqqartuussissuserisumit, ikiorserneqarnissamut periarfissaqassaaq. Naggataatigullu

pisassarisanik pineqartunik akiliisitsiniarneq eqqartuussisarneq pillugu inatsit atuuttusoq malillugu politiinit suliarineqassalluni.

Aalajangersakkami killiliinerup, pisassarisanut taarsiissutissap annertussusia apeqqutaatinnagu nunap karsianit taarsiiffigisassanut tunngasunut atuutinnginnera tun-ngaveqartinneqarpoq pisassarisat (annertunerusumik annikinnerusumilluunniit) nunap karsiata aningaasaataanut tunngasuunerat, taamaammallu –amma allaffissornermik tunngaveqartumik – pisassaqartuusut taakkuninnga utertitsisinaanissaat naleqqutsinneqarani.

Imm. 8-imi siunnersuutigineqarpoq, pisassarisanik akiliisitsiniarnermut oqartussaasumut tunniussinermi, tamatumani aamma piumasarisat naafferartumik akilersoneqarnissaannut imaluunniit akiliinngikkallarnissamik akuersissuteqarfiusinnaasut annertussusiinut, akilersuinissamullu akiliinngikkallarnissamillu aaqqiinerit sivisussusissaat pillugit, ileqqusumik eqqaasitsissuteqartarnermik periutsimut minnerpaamik piumasaqaatit pillugit, kiisalu pisassarisanik utertitsisarneq pillugu, erseqqinnerusumik malittarisassanik aalajangersaanissamut Naalakkersuisut pisinnaatinneqassasut.

Aammattaaq pisassarisat akiligassat kinguaattoorutaalinngikkaluartut akiliisitsiniarnermut oqartussaasumut tunniunneqarsinnaanerannut erseqqinnerusumik najoqqutassanik aalajangersaaneqarsinnaassaaq.

Tamanut tunngatillugu pingaartinneqassaaq pisassarisanik akiliisitsiniarnermut oqartussaasumut tunniussinerit sapinngisamik malittarisassat naligisarsiortuunngitsut malillugit pisassasut, elektronikkimik atortut atorlugit nuunneqarsinnaasunngorlugit –assersuutigalugu akiligassaqartuusooq akiliinikkut saaffiginnikkulluunniit pisassaqartuusumit akiligassiissummut eqqaasitsisummulluunniit qisuariaateqanngippat.

Aammattaaq siunnersuutigineqarpoq pisassarisat elektronikki atorlugu atortorissaarutitigut tunniunneqartarnissaat pillugu malittarisassanik aalajangersaanissamut Naalakkersuisut pisinnaatinneqassasut. Pisinnaatitsissut atorneqarsinnaassaaq pisassaqartuusup akiliisitsiniarnermullu oqartussaasup akornanni elektronikki atorlugu attaveqaatinik attaveqarnerannut tunngasunut. Tamatumunnga atatillugu immikkut anguniagaavoq nalunaarsuutininik nalinginnaasumik taartigeeqatigiittarnerit tamarmik elektronikki atorlugu atortutigut pisassasooq. Akiliisitsiniarnermi aaqqissuussinerup nutaajusup atorneqalernissaataa tungaanut, pisassaqartuusut akiliisitsiniarnermut oqartussaasullu akornanni elektronikki atorlugu atortorissaarutitigut taartigeeqatigiittarnerit IT-mik atortut maanna pigineqartut aallaavigalugit pisassaaq.

§ 11 b

Imm. 1-ikkut siunnersuutigineqarpoq, Naalakkersuisut nalunaarutikkut akiligassiissutinik akileraaruserivimmut akilersinniagassanngorlugit

tunniunneqartunik ernialiisarnermut malittarisassanik aalajangersaanissamut pisinnaatinneqassasut.

Aalajangersakkap kinguneraa, pisassaqaartuusut pisassarisat akileraaruserivimmut akilersinniagassanngorlugit tunniunneqarnerisa kingornatigut qaammammit siullermiit pisassarsisaminnik ernialersuinissamut, nalunaarummi pineqartumi malittarisassat malillugit ernialiunneqarsinnaasut saniatigut, piunasaqaateqarsinnaannginnerat, takuuk imm. 2. tamannalu atuuppoq pisassaqaartuusut inatsit naapertorlugu allatulluunniit, assersuutigalugu pilersuinerumut piunasaqaatinut ilaatillugu, pisassarisanik ernialersuinissamut pisinnaatitaagaluarpataluunniit.

Malittarisassanik aalajangersaanermi erniat annertussusilerneru, pisassaqaartuusup pisassarisanut ataasiakkaanut atugarisaat aallaavigineqassapput, taamaasilluni akiligassaqaarfigisap akiligassaqaartullu inissisimanageri annertunerusumik allanngortinneqassanatik, pisassarisap akileraaruserivimmut akilertinniagassanngorlugu tunniunneqarnerani. Allanguinerilli pisarsinnaassapput naatsorsueriaatsit assiginngitsut atorneqarnerisa kingunerisaanik.

Erniat pisassaqaartuusunut nakkassapput, akiligassaqaartuusup akiliuteqarnera malillugu tunniunneqarlutik. Paasineqarpat akiligassaqaartup erniat akilersinnaanngikkai, pisassaqaartuusut erniat ilaannik akileraaruserivimmut piunasaqaateqarsinnaassanngillat.

Aalajangersagaq naapertorlugu ernialiunneqartut, akileraarusigaasussanik isertitat naatsorsorneqaranni ilanngaataasinnaanngillat, pillaataasumik erniat pineqarmata.

Imm. 3-mi siunnersuutigineqarpoq akileraaruserivik pisassarisanik akileraaruserivimmut akilersinniagassanngorlugit tunniunneqartunik ernialersuinerumik unitsitsisinnaanermut pisinnaatinneqassasoq, akiligassaqaartuusup akiitsunut pisussaaffimminik naammassinnissinnaanngippat ukiunilu qaninnermi tulluuttuni naammassinnissinnaalernissaa ilimanaateqarani. Akileraaruseriviulli akileraarutitut kinguaattoorutit ernialersuineq ingerlateqqilersinnaavaa, akiligassaqaartup aningaasatigut atugarisai pitsaanerulerpata imaluunniit paasineqarpat akileraaruserivik, ernialersuinerup unitsinneqarnissaanik aalajangiinerup nalaani, paasissutissanik suliamut attuumassuteqartunik tamakkiisumik pigisaqarsimanngitsoq.

Siunnersuummi eqqarsaatigineqarpoq, akiligassaqaartuusup aningaasatigut atugarisani pissutigalugit akiliisinnaanngissinnaanera pingaartumillu akiliisinnaalernissaa ilimanaateqarani, taamaattumillu ernialersuiinnarnissaq taamatut pisoqartillugu siunertaqassanani taamaallaallu naatsorsuuserinerumut tunngasuuginnassalluni.

Akiligassaqaartuusup aningaasaqarnikkut atugarisaanik naliliineru aamma eqqarsaatigineqarsinnaavoq akilersuinissamut isumaqatigiissutaasinnaasup akiligassaqaartuusup akiligassanut kinguaattoorutitut akiliuteqarsinnaanermiut peqatigitillugu ingerlaavartumik ernialersuinerumut malinnaasinnaanera.

Akileraaruseriviup ernialersuineramik unitsitsinissamik ernialersuinnginnissamilluunniit aalajangiineri akiitsoqartup akiitsuinik isumakkeerinissamik suliaasinnaasumut piumasqaateqarsinnaanermik nassataqarsinnaanngillat.

Akileraaruseriviup akiligassaqartup aningaasaqarnikkut atugarisaanik misissuinera annikinneruvoq, isumakkerinissamik suliaqarnermi misissuinerminngaanniit, akileraaruseriviup ernianik unitsitsinermik aalajangiinera allangortinneqarsinnaammat, akiligassaqartup aningaasaqarnikkut atugarisai pitsaanerulerpata imaluunniit paasineqarpat suliami paasissutissat aalajangiinerup nalaani tamakkiisuusimanngitut. Taamaasilluni akileraaruserivik qaqugukkulluunniit ernialersuinerup ingerlateqqinneqalernissaanik aalajangiisinnaavoq.

Ernialersuineramik unitsitsineq pillugu aalajangiineq akiligassaqartup qinnuteqarneratigut imaluunniit akileraaruseriviup nammineq naliliinera tunngavigalugu pisinnaavoq.

Imm. 4-mi siunnersuutigineqarpoq aalajangersagaq inuinnarnut tunngatillugu taamaallaat atorneqarsinnaassasoq.

Imm. 5-imi siunnersuutigineqarpoq pisassarisanik akileraaruserivimmut akilersinniagassangorlugut tunniunneqarsimasunik ernialersuineramik unitsitsinnaanermut ernialersueqqilersinnaanermullu tunngatillugu erseqqinnerusumik malittarisassanik aalajangersaasinnaanermut Naalackersuisut pisinnaatinneqassasut. Nalackersuisut ilaatigut akileraaruseriviup immikkoortua sorleq taamatut aalajangiisinnaanermut oqartussaassuseqassasoq aalajangersinnaavaat, taamatullu Naalackersuisut aamma qanoq pisoqarnerani akileraaruserivik ernialersuineramik unitsitsinissamik ernialersueqqilernermilluunniit aalajangiisinnaaneranut sinaakkutissat aqusinnaassallugit.

§ 11 c

Siunnersuutigineqarpoq pisinnaatitaaffiit pisussaaffiillu pisassarisanut ataasiakkaanut atasut, piumasqaatit akilersinniarneqarneranut atugassatut akileraaruseriviup tamaasa pisinnaatitaaffigilerlugillu pisussaaffigilissagai. Tamannalu ilaatigut imaappoq, akiliisitsiniarnermi sakkut, pisassarisanut ataasiakkaanut inatsiseqartitsinermi tunngatinneqartut, akiligassaqarfiusulluunniit pisarneq malillugu pisinnaatitaaffii allat, akiliisitsiniarnermi oqartussaasumit atorneqarsinnaasut. Tamatumani ilaatigut pineqarlutik taarteqarsinnaanermik qinnuteqarnissamut pisinnaatitaaneq, akiliutinik tulleriiarinissaq, eqqartuussivikkoortumik suliassiineq, akiliisinnaajunnaartutut suliarineqarnissamut tunniussineq, agguagarsiassanik akuersineq, akiitsut iluarsaassiffigineqarnissaannik siunnersuuteqarneq aammalu akiliinngikkallarnissamik akuersissuteqarneq. § 11 a, imm. 6-imut siunnersuummut tunngasumik matuma qulaani oqaatigineqartutut pisassaqartuusut aallaavittut pisassaq tamakkiisumik ilaannakortumilluunniit utertissinnaassavaat, assersuutigalugu piumasqaammut nuutsinissaq siunertaralugu.

Akileraaruseriviulli akiliisinnaajunnaartarneq pillugu inatsisip Kalaallit Nunaanni atortussanngortinneqarneranik peqqussutip avataatigut isumakkeerinninnermut tunngasunik suliani akiligassa qarfiit pisinnaatitaaffiik tigusaqassanngilaq, nalinginnaasumik nassuiaatini inatsisissatut siunnersuutip imarisai pingaarnert pillugit allaaserisami "Akiligassa qarfiusup pisinnaatitaaffii" pillugit immikkoortumi punkt 2-mi oqaatigineqartut. Assersuutigalugu Ineqarnermut Attaveqarnermullu Pisortaqarfik aamma A/S Inissiaatileqatigiiffik INI, boligstuttemut akiligassanut kinguaattoorutit isumakkeerneqarnissaannik, boligstutte pillugu Inatsisartut peqqussutaat naapertorlugu sulianik suliaqartarnerat ingerlatiinnassavaat.

Akiliisitsiniarnermi oqartussaasup sulinermi periuseqarnissaani aallaaviusumik eqqarsaataavoq suleqatigisanut akерlerisanullu periuseqarnerit assigiinngissitaartumik i-ngerlanneqartassasut. Taamaasilluni akiliisitsiniarnermi oqartussaasup anguniagassaa tassaalerpoq akiligassanut kinguaattoorutit nukinnik atuinikinnerpaajusumik naleqqunnerpaamillu periuseqarluni akilersinniarnissaat. Taamaattumik akilitsitsiniarnermi oqartussaasup aamma akiliisitsiniarnermi iliuutsit piareersarlugillu tullerriaartussaassavai akiligassa qartut pisortanut akiligassaminnik akilersuinissamut piumassuseqarnerat pisinnaanerallu tunngavigalugit. Taamaammat annertunerusumik pinngitsaaliinikkut akiliisitsiniarnermi iliuutsit soorlu akissarsianit ilanngaassuisitsinerit aamma pigisanik qularnaveqqusiisitsinerit aallaaviusumik akiligassa qartunut akiligassanut kinguaattoorutinik naammassinnissutaasinnaasumik akilersuinissamik isumaqatigiissuteqartunut tamatuminnigalu malinnittunut atorneqassanngillat. Pigisanik qularnaveqqusiussisitsineq maannamutut assersuutigalugu akiligassanut kinguaattoorutinut, akiliinissamik kinguartitsigallarnermi qularnaveqqutitut atorneqarsinnaavoq.

Tamatumalu saniatigut nalinginnaasumik nassuiaatini punkt. 2-mi inatsisissatut siunnersuutip imarisai pingaarnert pillugit allaaserisami immikkoortoq akiliisitsiniarnermi periutsimik allaaserisaq innersuussutigineqarpoq.

Malittarisassat, nalinginnaasumik pisuussutit pillugit inatsiseqartitsinermi tunngavigisanik aallaaveqartut, maanna atuuttuusut malillugit, akiligassa qartup akiliutini sumut atorneqarnissaannik aalajangiisarpoq girokortip aalajangersimasup atorneratigut, kontomut aalajangersimasumut netbankikkut akiliuteqarnikkut allatulluunniit akiligassa qarfiittut oqartussaassuseqartumut aalajangersimasumut akiliuteqarnikkut. Akiligassa qarfigisaasullu taava akiliut akiligassa qartup kontoani, akiligassa qartup akiliutit piumasaqaammut sorlermut matusissutissanut atorneqarnissaannut toqqartumik toqqaannartuunngitsumilluunniit innersuussinera malillugu, ilanngaatigissavai. Sumut atuinissaq taamatut nalunaarsimangippat, assersuutigalugu akiliutaagallartunik akiliineqarsimappat, akiligassa qarfigisap aallaavittut akiligassa qartup akiligassaanut amerlanerpaajusunut akiliutigineqartut ilanngaatigissavai. Immikkut nanertuutaasumik akiligassatut taaneqarsinnaapput akiligassat erniaqartitaasut, erniaqartitaanngitsunut sanilliullugit. Taamatut periuseqarneq atorneqartassaaq inatsiseqartitsinermi matussutissiinnermut tullerriaarinerмик aalajangersagaqanngippat. Inatsisitigut aalajangigaasumik matussutissiinnermut tullerriaarineq eqqartuussisarneq pillugu inatsimmi kapitali 7, § 12, imm. 3-mi takuneqarsinnaavoq, tassani inuunnaat inuuniarnermut tapiissutinik piumasaqaataat siulliullugit akilerneqassasut aalajangersarneqarmat.

Imm. 2-mut siunnersuummi erseqqissarneqarpoq, akiliisitsiniarnermi oqartussaasup naafferartumik akilersuineq akiliinngikkallaarnissarlunniit akuerisinnaagaa. Akiliisitsiniarnermi oqartussaasup suliassat suliarineqartarnerat pillugu, aammalu nalunaarsuiffiit pisortanit pigineqartut pillugit, inatsisit najoqqutaralugit akiligassaqqartoq pillugu paasissutissanik suliassap sapinngisaq tamaat aallunneqarnissaanut pisariaqartunik pissarsisinnaavoq, tamatumani naafferartumik akilersuinissamik aaqqiinermi akilinngikkallarnissamillu akuersissuteqarnerni, eqqarsaatigineqassallutik inuttut pissutsinik atugarisat aningaasaqarnikkullu atugarisat.

Inatsisikkut nalunaarutikkullunniit naafferartumik akilersuinermut akiliinngikkallarnissamillunniit akuersissuteqarnermut tunngasunik malittarisassanik aalajangersagaqarpat, akiliisitsiniarnermi oqartussaasup malittarisassat taamaattut malitassarai.

Imm. 3-mi siunnersuutigineqarpoq akiliisitsiniarnermut oqartussaasup akiligassanut kinguaattoorutit pillugit paasissutissat ilaannik pisassaqqartuusunut tunniussisinnaanera pillugu malittarisassanik Nnaalakkersuisut aalajangersaasinnaasut. Ingerlatitseqqiinerlu pineqartut taamaallaat tassaapput nalunaarsuutit akiliisitsiniarnermi oqartussaasumi suliassat suliarineqartarnerat pillugu aamma pisortani oqartussaasut nalunaarsuusiaat pillugit inatsisini inunntut tunngasunik paasissutissanik nalunarsuineq ingerlatitseqqiinerlu pillugit malittarisassat malillugit akiliisitsiniarnermi oqartussaasumit katersorneqarsimasut. Paasissutissanik elektronikki atorlugu atortorissaarutit aqutugalugit ingerlatsitseqqiineq siunnersuut malillugu taamaallaat pisinnaavoq pisassaqqartuusunut pisortanilu oqartussaasunut allanut akiligassanullu kinguaattoorutit pisassaqqartuusumut pineqartumut tunngatillugu amerlassusaannut, aammalu pisassaqqartunut allanut tunngatillugu akiligassanut kinguaattoorutininik peqarneranut tunngasunik, tassalu tamatumani pisassaqqartuusunut allanut tunngatillugu amerlassusiinik erseqqissaatitaqanngitsumik.

Najoqqutassiat pisinnaatitsineq tunngavigalugu pilersinneqartut, datatilsyn-imut tusarniassutugalugit nassiunneqassapput.

Aammattaaq siunnersuutigineqarpoq, akiliisitsiniarnermut oqartussaasup oqartussaassuseqqarfiinut akiliisitsiniarnermillu suliassat aaqqissuunneqarnerannut il. il. erseqqinnerusumik malittarisassanik Naalakkersuisut aalajangersaasinnaassasut. Pisinnaatitaaneq ilaatigut atorneqarsinnaassaaq akiliisitsiniarnermut oqartussaasup akiligassaqqarfiit pisinnaatitaaffiinik atuisinnaanera pillugu malittarisassanik aalajangersaanermut aammalu matuma qulaani oqaatigineqartutut akiitsoqartut isertitaqarnerannut, inuttut atugarisaannut, pisuussutininik pigisaqarnerannut najugaqarnikkullu il.il. atugarisanut tunngasunik paasissutissanik pissarsisinnaaneranut.

Aammattaaq akiliutinik aningaasanillu akilersinneqartunik pisassaqqartuusunut isumannaarinermut tunngasunik malittarisassanik Naalakkersuisut aalajangersaasinnaassapput.

§ 11 d.

Imm. 1-imi aalajangersakkami kommuneni pisinnaatitaaffiit pisussaaffiillu akileraaruseriviup pisinnaatitaaffigilerlugillu pisussaaffiligassai aalajangerneqarpoq. Tamatumani pineqarlutik pisinnaatitaaffiit pisussaaffiillu akiliisitsiniarnermi suliassat isumagineqarneranut atasuusut taamaallaat.

Aalajangersakkami pisinnaatitaaffiit pisussaaffiillu, akiliisitsiniarnermik suliassat tunniunneqarnerata nalaani kommunemut akiliisitsiniarnermik suliassamik tunniussisumut atasuusut tamarmik pineqarput. Tamannalu atuuppoq pisinnaatitaaffiit pisussaaffiillu pineqartut qanoq ittuunerat, inatsisitigut tunngavigisaat qangalu pisinnaatitaaffiit pisussaaffiillu piulersimanagerat apeqqutaatinnagu. Taamaasilluni aalajangersakkami pisinnaatitaaffiit pisussaaffiillu pisortat inuinnaalluunniit pillugit inatsiseqartitsinermik tunngaveqartumik pilersinneqarsimasut pineqarlutik. Taamatut i-ngerlatseqqiinermik tunngaviummik tamakkiisumik periuseq inatsisitigut aalajangersagaasoq kinguneqassaaq, assersuutigalugu akiitsoqartuusup kommunenilu akiliisitsiniartarfiit naafferartumik akilersuinissamik imaluunniit akiliinngikkallarnissamik akuersissutinut qularnaveeqqusinneq pillugu piumasaqaatit kommunip akuerisimasaanik isumaqatigiissutini akileraaruseriviup taartaalenera.

Aalajangersakkami pisinnaatitaaffiit pisussaaffiillu, akiliisitsiniarnermi suliassat tunniunneqarnerisa nalaani piusut pineqarput. Aalajangersakkami taamaasilluni pisinnaatitaaffiit pisussaaffiillu 31. december 2007-ip kingornatigut pilersinneqartut pineqanngillat.

Aalajangersakkami pigisat aammalu pisinnaatitaaffiit pisussaaffiillu taamaallaat akiliisitsiniarnermi suliassat isumaginissaannut atasuusut pineqarput. Tamatumunnga atatillugu pisinnaatitaaffiup pisussaaffiilluunniit aalajangersimasup pigineqalerneranut aalajangiisuuvoq, kommunip akiliisitsiniarnermi suliassanik isumaginninnerminut atatillugu pisinnaatitaaffigeneraa pisussaaffigeneraaluunniit. Akiliisitsiniarnermik suliassamik tunniussinerup nalaani atuutitsineq akileraaruseriviup taartaalerneranut aalajangiisuuvoq, siusinnerusukkut pisinnaatitaaffiup pisussaaffiillu sumut atuutsinneqarsimanera pinnani.

Aammattaaq aalajangersakkap nassataraa, pisortanik inuinnarnillu, akiliisitsiniarnermik suliassap suliarineqarneranut taamaallaat attuumassuteqartunik suleqateqarnermut tunngatillugu akileraaruseriviup nalinginnaasumik kommunemut taartaanera.

Imm. 2-mut siunnersuut malillugu kommuneni tjenestemandit sulinerminni akiliisitsiniarnermi suliassaannarnik annertunerpaamilluunniit suliqartut akileraaruseriviup 1. januar 2008-mi atorfeqartitarilissavai. Tjenestemandit Namminersornerullutik Oqartussanut, maannakkumut atorfeqarnermi atugassarititaasut assinginik atugassaqartitaallutik, nuussapput.

Aalajangersagaq kommuneni tjenestemandit atorfeqartut sorliit akiliisitsiniarnermik suliassanut malinnaallutik Kalaallit Nunaanni Namminersornerullutik Oqartussani atorfinitsinneqarnissaannik aqutsisuuvoq. Sulisut nuunneqarnissaata erseqqissumik killiliivigineqarnissaa, akileraaruseriviup kommunalbestyrelsillu ataasiakkaat akornanni isumaqatigiissuteqarnikkut aalajangiivigineqassaaq.

Naatsorsuutigineqarpoq oqartussaasut attorneqartuusut taamatut sulisunik nuussinerup naammassineqarnissaanut pisariaqartunik paasissutissanik pissarsillutillu nalunaarutiginnissasut, allagaatinik tunniussillutik allatigullu aamma ikiuullutik.

Atorfillit pineqartut tjenestemandit atorfinitsinneqassapput tjenestemandit pillugit inatsiseqartitsineq ataatsimoorussanillu inatsit taanna naapertorlugu isumaqatigiissutaasut tunngavigalugit.

Aalajangersakkap nassataraa akileraaruseriviup atorfinitsitsinermi oqartussaanera, atorfinitsitsinerlu Kalaallit Nunaanni Namminersornerullutik Oqartussani tjenestemandinut allanut atorfinitsitsinertut illuni.

Namminersornerullutik Oqartussani atorfinitsitaanermut ikaarsaariarneq immini nuutsitsinerussanngilaq. Tjenestemandit pineqartut taamaasillutik taarsiissutinik/utaqqinermi akissarsianik akissarsiaqarlutik soraarnerussutisiaqarlutilluunniit Namminersornerullutik Oqartussani atorfinitsitaanermut nuunnerup kisimi nassataarisaanik soraarsitaanissamik piunasaqaateqarsinnaassanngillat.

Aaammalu aalajangersakkap kinguneraa, tjenestemandit pineqartut siunissami atorfinitsitaaffimmi nutaami atorfimmumut naleqquttumut allamut nuunneqarsinnaanissamut pisussaaffeqarsinnaassasut.

Atorfiup allap naleqquttuusutut isigineqarsinnaaneranik naliliinermi atorfiup qanoq ittuussusiata maannamullu atorfigisamut ataqatigiisuunerata naliliiffiginerata saniatigut aamma eqqarsaatigineqassaaq atorfeqarfigisamik allanngineq pisortat suliffeqarfutaasa nalinginnaasumik allanngortiterneqarnerannut atatillugu pisinnaanera. Aammattaaq naliliinermi ilinniagaqarnermut, ukioqortussutsimut, peqqissutsimut, nalinginnaasumik atorfigisami isigineqarnermut il.il. tunngasut eqqarsaatigalugit naleqquttumik atorfimmumut innersuunneqartutut oqaatigineqarsinnaassanersoq eqqarsaagtigineqassaaq. Tamanna isumaqarpoq tjenestemandip pineqartup atorfeqarfigilikkami nutaami naleqquttumik atorfimmik, maannamut atorfeqarfigisamini atorfigilissallugu pisussaaffiginngisamini, atorfeqalersinnaanissamut pisussaaffeqarsinnaanissaa.

Tamannali atuutinngilaq nutaamik atorfeqalerfigisami sinaakkutaasut iluanni atorfimmik allamik atorfeqalerneq immikkut inummut pineqartumut allannguutaasunik nassataqarpat.

Imm. 3 malillugu akileraaruserivik akiliisitsiniarnermik suliassasat ingerlanneranni atugassanik illuutinik ilaannaannilluunniit, allaffimmi atortunik assigisaannillu

kommunenit attartornissamut periarfissaqartinneqassaaq. Taamaasiornikkut sulisut akiliisitsiniarnermillu suliassat ingerlanneqarnissaata sumiiffissinneqarnissaa eqqarsaatigalugu aaqqissuulluakkamik ingerlanneqarnissaa periarfissinneqassalluni. Taamatut periarfissaqarnermi aamma ilaavoq kommunip illuutigisaata ilaanik attartorsinnaaneq, assersuutigalugu kommunip allaffiani init ilaannik, maannamut kommunip akiliisitsiniartarnermik ingerlatsinermini atorsimasaanik, akileraaruseriviup akiliisitsiniarnermik suliaqarnermi atuinnarusutaanik. Taamatut attartornermut isumaqatigiissuteqarnissamut periarfissaq atorneqassappat naatsorsuutigineqarpoq akileraaruserivik tamakkununnga nalinginnaasumik akiusut malillugit akiliisassasoq. Sivikinnerusumik sivisunerusumilluunniit attartornermut isumaqatigiissutit pisariaqarsinnaasassapput.

§ 11 e

Kommunit edb-nik atortui ilaatigut akiliisitsiniarnermi sulianik aqutsinermut atortunik imaqarput. 31. december 2007-ip kingornatigut aamma akileraaruseriviup paasisutissanut tamakkununnga ingerlaavartumik ulluinnarni sulinermi aammalu siusinnerusukkut nalunaarsugaasunik paasisutissanut isersinnaanissaa pingaaruteqarpoq. Tamatuma qulakkeerneqarnissaanut siunnersuutigineqarpoq, akileraaruserivik kommunit akiliisitsiniarnermut moduliinut inatsisip saqqummiunneqarneraniit, siunnersuummi § 2 naapertorlugu, isersinnaalissasut, taamatullu akileraaruserivik paasisutissanik taakkunani immiunneqarsimasunik atuisinnaanermut pisinnaatitaassalluni.

Akiliisitsiniarnermik ingerlatsineq arlalitsigut kommunit naatsorsuuserinerannut naatsorsuutitigullu suliaannut attuumassuteqarpoq. Paasisutissanik taarsiivigeqatigiittarnerup annikillisinnaaneranut annilaanganartuusinnaasut illuatungilerniarlugit siunnersuutigineqarpoq kommunit akileraaruserivik kommunit naatsorsuuserinikkut suliaannut, naatsorsuutitut assigisaannullu pisariaqartitsineq naapertorlugu isersinnaanissamut pisinnaatissagaat, tamatumani aamma assersuutigalugu sulianik aaqqissuussinernut assigiinngitsunut, akileraaruseriviup naliliinera naapertorlugu akiliisitsiniarnermi suliassat ingerlannissaannut pisariaqartinneqartunut.

Istersinnaanermi aamma terminalimut pisariaqartitsineq naapertorlugu isersinnaanissaq pineqarpoq.

§ 11 f

Aalajangersagaq malillugu sulisut, suliassat, suliani allagaatit il.il. kommuneniit akileraaruserivimmuut nuunneqarnerisa ingerlanneqarnerannut malittarisassanik aammalu kommunini innuttaasunik akiliisitsiniartarnermut tunngasutigut sullissinermut tunngasunik aalajangersaanissamut Naalakkersuisut pisinnaatinneqarput. Assersuutigalugu soorlu kommunit innuttaasunik akiliisitsiniartarnermut tunngasutigut sullissinerisa akilerneqartarnerat pillugu,

nuussinermi immikkoortut ataasiakkaat ingerlanneqarnissaannut piffissaliinerit pillugit aammalu allagaatinik toqqortaait tunniunneqarnissaannut malittarisassanik.

§ 11 g

Siunnersuutigineqarpoq Naalakkersuisut akiliutinik ingerlatsisartunik (aningaaserivinnik, allakkerivimmik KNI-millu) 300 koruunit ataallugit akiliisoqartillugu akiitsoqartunik suliamut aningaasartuutitut akiliuteqartitsisannginnissaannik isumaqatigiissuteqarsinnaanermut pisinnaatinnegarnissaat. Illuatungiliullugu akiliutinik ingerlatsisartut tamakkuninnga suliaqarnerminnut aningaasartuutaat nunap karsianit akilerneqartassallutik. Siunnersuut nalinginnaasumik nassuiaatini akiliisarnerit pillugit immikkoortumi tunngavilersorneqarpoq.

Nr. 6-imut

Siunnersuutigineqarpoq kapitali 3 nutaaq ilanngunneqassasoq qulequtaqartillugu - pineqaatissiissutit, atuutillerneq il.il.

Nr. 7-imut

§ 12 a

Aalajangersakkami imm. 1-mi, § 12 naapertorlugu akiliisitsissutit aalajangiivigineqarnerannut tunngasumik suliat, allaffissornikkut aalajangiivigineqarsinnaanerat inatsisitigut tunngavissinneqarpoq.

"Akiliisitaanermi sakkortunerusumik" pineqaatissiinermik oqarnermi ilaatigut unioqqutitsinerit inissiisarfimmittitsinerimik pineqaatissiissutigineqarsinnaanerat pineqarpoq.

Suliaq allaffissornikkut akiliisitsinermik naammassineqarsinnaavoq aatsaat pasineqartoq nalunaarummi allaaserineqartumik pisimasumi pisuunerminik nassuerlunilu akiliisitaassutissap taaneqartup akilernissaanut pisussaaffilerpat. Assersuutigalugu pasineqartoq suliap sukkasuumik naammassineqarnissaa eqqarsaatigalugu akiliisitsissummik akiliiniarluni akuersippat, pisuuninili nassuerutigiginagu, suliap naammassineqarnissaanut piunasaqaataasut naammassineqassanngillat.

Allaffissornikkut akiliisitaanermik aalajangiineq tassaavoq akileraaruseriviup pasineqartullu akornanni isumaqatigiissut. Pasineqartup taamatut isumaqatigiissuteqarnissaaq kissaatiginngippagu imaluunniit akileraaruseriviup tamanna pillugu saaffiginninnerinut qisuariaateqanngippat, suliaq Kalaallit Nunaanni Politimesterimut unnerluusummik sananissaaq suliallu eqqartuussiveqarfimmi aalajangiivigineqarnissaa siunertaralugit tunniunneqassaaq.

Akiliisitsissummik akiligassiisuttip imm. 2 malillugu eqqartuussisarneq pillugu inatsit malillugu pinerluttulerinermi unnerluussuttip imarisaanut qaqugukkulluunniit, maannakkumut takuuk eqqartuussisarneq pillugu inatsimmi kapitali 5, piunasaqaataasut naammassisimassavai. Eqqartuussisarneq pillugu inatsit maannakkut unnerluussuttip ilusilerneranut imarisaanullu erseqqissumik piunasaqaatinik imaqaangikkaluartoq, nalunaarummi pasineqartup erseqqissumik kinaaneranik taasaqarnerup saniatigut pisimasoq qanga sumilu pisimanageratigut immikkoortinneqarsinnaangorlugu allaaserineqassaaq. Nalunaarut aamma imaqassaaq aalajangersakkat unioqqutinneqarsimasut erseqqissumik oqaatigineqarnerannik aammalu unioqqutitsinerit taamaattut pineqaatissiinnermut aalajangersakkani sorlorni ilaatinneqarnerisut oqaatigalugu.

Imm. 3 malillugu pasineqartup akileraaruseriviup akiliisitsissummik saqqummiusnaanik akuersineranik isumaqarpoq, akisussaassutsimut tunngasumik apeqqutip aalajangiiffigineqartoq, akiliisitsummillu akuersinerup eqqartussiveqarfimmi suliarineqarnissaraluanut taamaasilluni taarsiulluni.

§ 12 b

Aalajangersakkami imm. 1-ip nassataraa, Inatsisartut inatsisaat naapertorlugu suliaasunik nalunaarutini aalajangersakkanik unioqqutitsinerimut akiliisitaassutinik aalajangiinnermut malittarisassanik aalajangersaaneqarsinnaanera.

Imm. 2 malillugu inatsisit malillugit akisussaassuseqartuusut taamaattuusutut najoqqutassianik unioqqutitsinerimut akiliisitaassutinik pineqaatissinneqarsinnaapput.

§ 12 c

Aalajangersakkap nassataraa, akilisitaassutit, allaffissornikkut aalajangerneqartut eqqartuussivimmiluuunniit §§ 12-12 b naapertorlugu eqqartuussutaasut, nunap karsianut nakkassapput.

§ 2-mut

Imm. 1

Siunnersuutigineqarpoq Inatsisartut inatsisaat 1. januar 2008-mi atuutilissasoq.

Imm. 2

Siunnersuutigineqarpoq pisassat akileqquneqartarnerat akiliisitsiniartarnermillu kommunit suleqatigiinnerat pillugu Inatsisartut inatsisaat atorunnaarsinneqassasoq, nunamut tamarmut atuuttuusumik akiliisitsiniarnermut oqartussaasumik pilersitsinerup kingunerisaanik atorfissaarummat.

Imm. 3

Siunnersuutigineqarpoq § 11 e aamma § 11 f, Inatsisartunut, Naalagaaffiup Sinniisaanut, Politiinut, kommuneinut eqqartuussivinnullu inatsisissatut siunnersuutip nassiunneqarneranniit sapaatit akunerisa marluk qaangiunneranni atuutilissasut.

Aalajangersagaq inatsisartut Naalakkersuisullu pillugit Inatsisartut inatsisaanni § 25, imm. 1-imi atuutilertermut malittarisassanut nalinginaasunut naapertuuppoq. Nalakkersuisut tamatumuuna inatsimmut allannguutissatut inatsisip ilisimatitsissutigineqarneranniit atuutilersitsinissamut aalajangersakkat atuutilersinnissaannut periarfissaqalissapput, § 11 e naapertorlugu. Kommunillu aamma piffissaq taanna aallarnerfigalugu akileraaruserivik pisariaqatitsineq naapertorlugu akiliisitsiniartarnermi atortuminnut il.il., § 11 d naapertorlugu, isersinnaatinnissaanut pisussaaffeqalissapput.